

明三十家詩選二

義
李東陽 六十七首
李夢陽 四十一首
何景明 百三十五首

柳田文庫

文庫11

D 173

2



文庫 11
D/173
2

明三十家詩選初集卷三上

錢塘 汪之端 允莊輯

李東陽 六十七首

東陽字賓之茶陵人以戌籍居京師四歲能作徑尺書景帝召試之抱置膝上六歲八歲兩召見講尚書大義稱旨命入京學天順八年成進士年十八選庶吉士授編修累遷侍講學士宏治九年旱災求言賓之條摘孟子七篇大義附以時政得失數千言上之擢禮部右侍郎久之進太子太保禮部尚書兼文淵閣大學士十七年重建闕里廟成奉命往祭還上疏言民間疾苦及親藩內官暴橫狀帝嘉歎之是時帝



010190557753

數召閣臣面議政事賓之竭心獻納有關失必盡言
匡諫疏出天下傳誦與劉健謝遷並稱賢相孝宗崩
武宗卽位屢加少師劉瑾入司禮賓之與健遷卽日
辭位詔聽健遷去而賓之獨畱恥之再疏懇請不報
瑾凶暴日甚務摧抑縉紳於賓之陽禮敬而陰實忌
之幾爲焦芳所傾者屢矣凡瑾所爲亂政賓之彌逢
其間亦多所補救劉健謝遷劉大夏楊一清平江伯
陳熊輩幾得危禍及匿名書事皆賴賓之力爭而解
潛移默奪保全善類天下陰受其庇五年秋瑾誅賓
之上疏自列請黜罷温旨慰留之帝好嬉游出入無
度大興豹房之役建寺觀禁中調宣府軍入衛等事

賓之前後上疏極諫帝終不聽以老疾乞休章凡數
上至七年始許之歸四年卒年七十贈太師諡文正
子兆先亦有雋才早夭遂無後賓之事父淳有孝行
官翰林時嘗會飲至夜深父不就寢以待其歸自此
終身不夜飲於外爲文典雅流麗朝廷大著作多出
其手獎成後進推挽才彥士大夫出其門及爲所賞
拔者悉粲然有所成就若石瑤羅玘邵寶顧清魯鐸
何孟春楊慎儲懽林俊喬宇張邦奇孫承恩陸深錢
福汪俊汪偉吳儼等其尤著者也立朝五十年清節
不渝罷相家居購詩文書篆者填塞戶限頗資以給
朝夕一日夫人方進紙墨賓之有倦色夫人笑曰今

日設客可使案無魚菜耶乃欣然命筆移時而罷其風操如此所著有懷麓堂詩文前後集南行北上諸稿又有經筵講讀東祀集句哭子求退諸錄明末板燬 國朝康熙壬戌茶陵州學正廖方達彙集重刻之凡一百卷

王元美曰嚮者於李西涯樂府病其太涉議論過爾剪抑以爲十不得一自今觀之奇旨創造名語疊出縱未可被之管絃自是天地間一種文字若使字字求諧於房中鏡吹之調取其字句斷爛者摹仿之以爲樂府如是則豈非西子之顰邯鄲之步哉

陳元孝曰西涯樂府得古詩之遺風刺並見含蓄可

味使人自得於言外別爲一格奚而不可

朱錫鬯曰文正弘獎羣英力追正始由其天材穎異長短豐約高下疾徐滔滔莽莽惟意所如其自序謂耳目所接興況所寄左觸右激發乎言而成聲雖欲止之有不可得而止者此自得之言也若其擬古樂府因人命題緣事立義別裁機杼方之楊廉夫李季和輩似遠勝之

沈確士曰永樂以後詩教中衰茶陵振而起之如老鶴一鳴喧啾俱廢而王元美謂長沙之於李何猶陳涉之啟漢高此習氣未除不免抑揚太過宜招後人之培植也

蔣慎齋重刻懷麓堂全集序其略曰嘗觀古人身後則論定獨明李西涯先生歷二百年褒刺不一嗚呼西涯何遇於生前而不遇於身後也幼舉神童未冠成進士過壯大拜歷首輔受孝宗顧命無一差蹶不可謂不遇矣迄秦人康王輩失職怨望負材謾罵其初不過爭文章之名意氣所激遂欲使不得爲全人士林一唱百和謂西涯文章取熟爛人物取軟靡其最所指摘者劉謝已去國西涯獨眷戀不休當時已有回首長沙芳草綠鷓鴣啼罷子規啼之譏不知西涯之苦心正在此也三公同受顧命朋友寄託猶不可負況君父乎老僕受故主命輔幼主值其不肖寧

禦侮和內以守其家乎抑畏禍懼罪逃而不顧乎託孤寄命臨大節而不可奪鞠躬盡瘁死而後已西涯得其遺意焉嘗聞致仕後每談國事悲咽不已深有幽冥負先帝之憾陸儼山詩曰白髮門生思往事每談憂國淚雙漣古今貪位據勢者寧有憂國之淚耶當逆瑾擅柄劉謝二公以介持之西涯獨外與和而內與辨陽爲調劑而陰護正人故在孝宗朝有細必爭武宗朝有大必爭瑾忤奴所護者細爭其細則必亂予以細則必安斯大臣之體亦御小人之法也史稱扶植善類滋培元氣此二語何易承當苟非酌沈潛高明之中劑競練緩急之宜史臣必不鼻此語而

後人尙欲議之何哉一旦立門戶尙氣節則俊厨甘
陵元祐黨人之禍起其遺害賢士大夫寧終極耶故
當日論西涯者西涯不與之辨惟守己率物優容樂
易以鎮之老臣憂國議論誠所不恤也後日論西涯
者西涯門人滿天下卒無一人持激論以相衡惟守
其學志其行不敢以黨護禍國家不敢以爭名毒縉
紳至嘉靖末猶賴西涯之門生故吏以治天下則西
涯之教可知也至今日而後論定嗚呼西涯又何不
遇於身後哉澄懷居士按慎齋名永修宜興人江南
通志稱其康熙時督學楚中振興文教
楚風爲之一變此序持論平允可謂
西涯知己因節錄於此以彰公是
嚴海珊曰公之清節人所共知唯與劉謝同受顧命

二公去公獨留氣節之士至引狄文惠身事牝朝爲
盧姨所譏與伴食中書並詠吾師李穆堂先生推原
本末則曰公不去將爲其難者耳政事闕失廷辨疏
論解紆調劑諸賢幾得危禍皆賴以免而功尤偉者
薦起楊一清借張永平寘鑄因爲畫誅瑾策然後黜
羣奸用梁儲劉忠朝政一新其經營苦心實無異於
文惠也學者僅以高文典冊皮相燕許其可哉

汪端論曰西涯七古出入少陵眉山之間七律清逸
流麗工於使事最近劉夢得餘體亦醇正無疵雖才
情秀發未逮青邱大復而氣度雍容風骨道健究不
愧爲詩家正宗虞山過相推挹以明代第一人目之

漁洋肆口毀斥以為軟靡熟滑準之公論均無當也
申生怨

十日進一胙君食不得嘗讒言豈無端兒罪誠有名兒心
有如地地墳中自傷兒死不如犬犬得死君傍天地豈不
廣日月豈不光悲哉復何言一死以自明潘辰云聲氣俱盡更着不得一語

縣山怨

五蛇上天一蛇螫縣山經月火不滅君王恩重翻為仇不
如放作山中囚君王有臣一非少貪天之徒但自保臣心
見母不見君誰言母死非君恩今辰何辰夕何夕畱與千
年作寒食

漸臺水

漸臺水深幾許使者來誰遣汝不見君王符空傳君王語
漸臺水行宮不可度妾死猶首邱君行在何處平生委質
身為君此時重信輕妾身君不還妾當死臺高高水瀟瀟
謝鳴治云死不忘君更見忠厚非徒死者

新豐行

長安風土殊不惡太公但念東歸樂漢王真有縮地功能
使新豐為故豐人民不異山川同公不思歸樂關中漢家
四海一太公俎上之對何匆匆當時幸不烹若翁潘辰云古無一字不合

文成死

文成封五利。封神仙只在東海東。文成死五利死。天下神仙皆妄耳。漢家武皇帝者英。昔何惜矣。今何明。君不見百年身。萬年計。前秦皇後唐帝。與香山海漫漫作可相。頡頏張文昌無此筆力。

牧羝曲

嗟汝陵咄汝律。羝可乳節不可屈。咄汝律。嗟汝陵。寧為我死。不作汝曹生。生入朝身已老。有淚猶沾茂陵草。天遣生還入畫圖。不然誰識冰霜貌。潘辰云句意律兀甚稱。題臨江節士辭恐不及。

馮婕妤

圈門晝開熊不守。婕妤當前眾嬪走。荷君恩寵捍君危。不然安用賤妾為。君身如山妾如葉。君有不虞安置妾亦知。倉卒非賈恩。恩多如深翻在睫。馮婕妤昔非勇。今非怯。掖

庭。佞兒何喋喋。潘辰云用。事自活。

四知歎

故人知君君不知。故人下有厚地。今上有蒼昊。縱不吾知。兮吾心有神。金獨何為兮。至吾門。吾閉吾門兮。省吾身。潘辰云結二句直從意外生意。又進一步。使關西聞此未必不懽然而起也。

燕巢林

胡馬來飲淮浦春。燕歸巢江樹。石頭城立不住。狼居胥在何處。耕問奴。織問婢。誰遣書生論兵事。萬里長城元自棄。生不逢檀道濟。使事如無。縫天衣。

姦老革

姦老革。天下寧有許多賊。潼關以東大有人。悔不盡殺東

都民民不欲。多多即亂安。得龍舟數千夫。八萬君不見。江
都城外。人圖儂。那能更到丹陽宮。謝鳴治云。蒙蔽之禍。可
為永鑒。言不必盡。意耳。

亡賴賊

亡賴賊逢人。殺難當。賊不平。殺為佳。賊臨陣。殺為大。將見
賊殺少年作賊。不愛身。逢時幸作干城臣。宮中一言後。宮
易終。負先朝為國賊。謝鳴治云。別是一格。潘
辰云。脫不得此一字。

机上肉

李唐天下猶有主。見欲與韋母欲。武家廟食唐為周。唐
宗骨肉皆仇讐。周延酷吏開告密。白頭司空反是實。司空
不死唐不亡。天意豈在廬陵王。中興功業回天地。盡是司
空門下吏。二凶雖除。五王族痛恨。當年存机肉。
起結包括一切。

韓休知

內家伎樂喧歌酒。外庭宰相還知否。語罷封章驚在手。君
王對鏡念蒼生。一身甘為韓休瘦。嗚呼曲江以後無此賢。
梨園羯鼓聲震天。何由再見開元年。楊抱遺避
三舍矣。

卿勿言

卿勿言。朕自思。南詔覆師君不知。卿勿憂。朕自保。范陽弄
兵苦不早。卿邪誰邪。高與楊非姚非宋。還非張有言如此。
尚不用。豈有藥石鍼膏膏。君不見咸陽老人能直諫。何曾
得睹君王面。潘辰云。曲
盡事理。

司農笏

司農手中無寸鐵。奪笏擊賊賊腦裂。賊雖未死氣已折。奉

天。天。子。雙。淚。橫。十。年。棄。卿。真。負。卿。臣。身。區。區。勞。記。憶。平。原。太。守。曾。未。識。

潘辰云委曲規諷正自動人

養兒行

此詠李懷光義子石演芬事結語指懷光子璿

朝。廷。養。公。公。養。兒。兒。為。心。腹。股。肱。誰。當。時。義。氣。各。相。許。見。不。負。公。負。主。養。兒。至。死。心。不。易。寧。不。為。兒。不。為。賊。君。不。見。入。朝。告。變。歸。殺。身。此。兒。非。養。寧。非。真。養。兒。雖。死。名。不。腐。惟。有。真。兒。心。獨。苦。

潘辰云能道演芬意中事

王凝妻

妾。生。愛。身。如。愛。玉。玉。可。玷。身。不。可。辱。生。不。逢。魯。男。子。彼。氓。何。知。妾。為。恥。揮。刀。斷。臂。不。自。謀。已。看。此。臂。為。妾。仇。不。恨。妾。身。出。無。主。但。恨。妾。身。為。婦。女。君。不。見。中。原。將。相。誇。男。兒。朝。

梁暮周皆逆旅。長樂老固不知愧也

十六州

契。丹。助。晉。兵。一。號。三。十。萬。晉。家。報。契。丹。一。數。一。疋。絹。三。十。萬。絹。何。足。惜。一。十。六。州。空。棄。擲。遂。令。宋。統。成。偏。安。中。原。以。北。無。幽。燕。金。元。相。承。二。百。載。痛。哭。衣。冠。化。兜。鍙。至。今。五。鎮。接。三。邊。不。備。西。陲。備。東。海。

澄懷云史斷錚錚有鏡近時惟蕭樊村先生樂府足以競勝

安石工

端。禮。門。金。石。刻。丞。相。手。書。姦。黨。籍。長。安。役。者。安。石。工。不。識。人。賢。愚。但。識。司。馬。公。卑。疎。不。敢。預。國。事。幸。免。刻。名。為。後。累。匹。夫。憤。泣。天。為。悲。黃。門。夜。半。來。毀。碑。碑。可。毀。亦。可。建。蓋。棺。事。久。乃。見。不。見。姦。黨。碑。但。見。姦。臣。傳。

謝鳴治云暗中摸索亦可識潘辰云此篇

音節頓挫意氣
激烈殆不可及

兩太師

和議是塞外蒙塵走天子。和議非軍前。函首送太師。議和
生議戰。死生國讐死。國恥兩太師。竟誰是。斬釘截鐵兩姦
有知亦應破膽

參謀來

新將代舊將去。參謀來。軍有主。受命犒。不受戰。參謀行。真
獨斷。宋家養兵二百秋。大功竟屬書生收。翻令愧死劉揚
州君。不見陝西歸來笏。畫地遺恨他年六州棄。敘事
簡暢

千金贈

相門深深夜半扃。百年恩重千金輕。二人辭受本同情。君
王但賞辭金名。嗚呼一檜死。一檜生。君王孤立臣為朋。誰

哉更問胡邦衡。謝鳴洽云
振古如茲

花將軍歌

花將軍身長八尺勇絕倫。從龍渡江江水渾。提劍躍馬走
平陸。敵兵不能逼。主將不敢嗔。殺人如麻滿川谷。徧體無
一刀鎗痕。太平城中三千人。楚賊十萬勢欲吞。將軍怒呼
縛盡絕。罵賊如狗狗不信。檣頭萬箭集如蝟。將軍願死不
願生。作他人臣。鄣夫人赴水死。有妻不辱將軍門。將軍侍
婢身姓孫。收屍葬母抱兒走。為賊俘獻隨風塵。寄兒漁家
屬。漁姥死生已分歸。蒼旻賊平身歸竊兒去。夜宿陶穴如
生墳。亂兵爭舟不得渡。墮水不死如有神。浮槎為舟蓮為
食。空中老父能知津。孫來抱兒達行在。哭聲上徹天能聞。

帝呼花雲兒風骨如花雲手摩膝置泣復歎雲汝不死猶
兒存兒年十五官萬戶九原再拜君王恩忠臣節婦古稀
有嬰杵尚是男兒身英靈在世竟不朽下可爲河嶽上可
爲星辰君不見金華文章石室史嗟我欲賦豈有筆力回
千鈞潘辰云此篇卓詭奇絕而圓活流動如珠走盤非心
得手應斷不至此司馬遷每以奇事試筆力于此
云亦

師召席上餞邵文敬戶部使淮安得作字

位雲鬱重陰霖雨久逾大平田偃頽波萬彙同一挫纍纍
黍穗落百畝不盈箇淮陽舊宜麥未足供甌磨稊稗價亦
增誰能問粳糯官租苦未給生理安可作城市多游民山
林有遺餓流離及溝壑去住總無奈地連兩畿邇業恐干
家破近聞恩詔下已放今年課漢臣發諸廩唐法通百貨
王事須賢勞地曹有良佐名辭鴻臚籍檄自尙書座行或
車馬艱詎免泥塗泥東南民力竭要使皇仁播官雖問升
斗職豈在揚簸平生翰墨場珠玉生咳唾簿書劇裁決餘
暇得酬和羣情恣幽眇品類入搜邏德澤乃膏腴文章比
糠莖舉世輕迂談茲言吾當坐偶託平生交因君識吾過
君當策勳伐極力起貪懦聊因贈行什預卜還朝賀

春草園爲黎本端作

出郭登平岡東原土新沃濃煙開萋迷見此千里綠紫紆
緣長隄蔥蒨滿幽谷芳情競爲榮遠意如有屬時光迭代
謝物理相剝復屈子騷莫陳江淹賦誰續吾人荆楚秀舊

住東山麓。娟娟名家子。被服蘭與玉。君無植桃李。桃李眩我目。君無踐荆棘。荆棘傷我足。眷茲君子心。風薰雨爲沐。培根去蕪穢。及此繼芳躅。桃李四語樂府神理公其有感於空同漢陂諸人之負恩耶

放船

月出風亦靜。臥聞雙櫓鳴。起看林巒過。始知我舟行。輕鷗逆素浪。幽草迎人生。清暉散宿靄。遠日增春明。風帆疾於鳥。頗快青雲程。豈不惜行路。懷歸意先征。浮雲西北馳。默然傷我情。起四語寫舟行如畫

夜過邵伯湖

蒼蒼霧連空。冉冉月墮水。飄飄雙鬢風。恍惚無定止。輕帆不用櫂。驚浪長在耳。江湖日浩蕩。行役方未已。羈樓正愁

絕。況乃中夜起。

劉尚質南樓題王舜耕山水圖

溪聲潺湲。雜林壑。山勢蜿蜒去。還卻浮雲欲起未起時。半在溪頭與山脚。入空高鳥飛欲盡。背屋斜陽慘將落。更無剩地與閒人。縱有紅塵何處着。南畝老翁雙鬢斑。筆法頗似高房山。少年豪宕老疎放。往往醉墨畱人間。平生畫癖兼山癖。一見此圖三歎息。愧我不如樓上人。日日開窗看秋碧。

題畫鷹送羅緝熙南歸

大鷹猙獰爪。決石側目高。堂睨秋碧。小鷹偃伏俯。且窺威而不揚。豈其雌雌雄。起伏各異態。意氣相看出塵壒。獨立

羞將衆羽羣。高飛怕有浮雲礙。山寒木落天始風。日色慘
淡。川原空。人間狐兔自有地。慎勿反擊傷。鷓鴣畫圖彷彿
是誰作。宛似懸鞬臂間落。高堂匹練長風生。萬里炎荒盡
幽朔。我生奇氣空嶙峋。揮毫對此未有神。送渠羽翼朝天
去。亦是雲霄得意人。澄懷云人間狐兔二語寓意深永覺
空同林良畫鷹歌全是英雄欺人語

送平江伯陳公總督修河兼束劉都憲時雍

黃河西來忽東決。張秋舊堤先受齧。奔波赴海勢不停。百
里漕渠一時泄。官船賈舶如山壅。河底沙乾日欲裂。九重
南顧回舜瞳。三命中朝持漢節。陳公舊是恭襄孫。奕代簪
纓萬人傑。爭誇將種非凡材。復道家傳有真訣。兵符夜檄
鯨鯢走。將令晝驅雷電掣。指揮能事天地回。坐計功成同

解結時方六月霖雨多地苦沮洳况炎熱民窮到骨聲徹
空忍使鞭笞汗成血極知國計須元氣乍可因時治癥瘕
比聞水發舟已通暫遣丁歸待農輟三犀永作洪濤鎮一
蟻不潰金隄穴古來大事當遠圖豈論竹頭兼木屑慣從
前史鑒興衰已聽高談能激切湖南中丞久奉使頗覺憂
勞成耄耄因公寄謝平生交自愧官曹容逸拙
仁人藹
如之言

風雨歎

壬辰七月壬子日大風東來吹海溢。崢嶸巨浪高比山水。
底長鯨作人立。愁雲壓地溼不翻。六合慘澹迷乾坤。陰陽
九道錯白黑。烏兔不敢東西奔。里人蒼黃神屢變。三十年
前未曾見。東村西舍喧呼遍。牒書走報州與縣。山厓谷洶

豺虎嗥萬木盡拔乘波濤洲沈島滅無所逃頃刻性命輕
鴻毛我方停舟在江皋披衣踞床夜復晝忽掩青袍涕雙
透舉頭觀天恐天漏此時憂國況思家不覺紅顏坐凋瘦
潼關以西兵氣多胡笳吹塵塵滿河安得一洗空干戈不
然獨破杜陵屋猶能不廢嘯與歌世間萬事不得意天寒
歲暮空蹉跎嗚呼奈爾蒼生何學杜較空同自然

夜過仲家淺聞

日維乙未月丙戌青天無雲月東出舟人喧逐夜濤發翻
沙轉石紛出沒是時水淺舟在地牖門崔嵬晝方閉牖官
醉睡夫走藏倉卒招呼百無計民船棄死爭赴牖檝倒檣
摧動交碎舟人號咷乞性命十里呼聲震天地我方兀坐

驚春撞攬衣而起心徬徨同行無人僕隸散獨與船月相
低昂攀崖陟磴不得上咫尺如在天一方流行坎止信有
數向來蔑視淮與江霜風欺人衣袂薄呼童酌酒累數觴
燈殘酒醒牖亦過北斗墜地天茫茫流行坎止二語中有至理

濟寧舟中會沈提學仲律有作復值濮武庫用昭遂

續長句時二君皆以憂歸江東

北風吹沙河水黑我舟自南君自北舟人叫鬧語不聞舉
首推篷兩相識君時卸帆我回舵欸語畱連日還夕世路
驚聞九折坂夢魂似隔三生石長安城中舊時社擊節高
歌氣相射君今慘澹凋朱顏一唱不和三歎息聚散悲歡
信偶然誰能預定明朝籍與君分手各珍重莫遣塵埃浣

顏色平生道義千黃金。肯向長途暗拋擲。兵曹濮君亦同志。強把高歌慰幽寂。我歌未竟君欲行。海樹江雲杳相憶。

靈壽杖歌

吾聞武當之山四萬二千丈。半在雲根半天上。不知三十六宮何處稱絕奇。產出靈株非一狀。蛟螭蟠拏露頭角。熊經樹顛虎山脚。根盤節錯相糾纏。含風飽雪經炎寒。九年洪水之水浸不殺。十日之日暴烈何其乾。梯懸磴接踈步不可上。誰采青壁紅琅玕。見之羨者不容口。錫以嘉名曰靈壽。爪之不入行。有聲金可同堅石。同久吾家此物舊。所有神與相扶鬼為守。自從病足跛曳不得前。已覺山林落吾手。一病經旬不出門。此杖手中嗟猶存。下床欹側立不

定此時託子以為命。不願四體無微疴。但願謝病歸山阿。左扶右策夾以二童子。下可涉園徑。上可凌坡陁。願載萬本截萬杖。窮崖陰谷生森羅。靈兮壽兮此物倘可致。直遣四海赤子頭俱皤。沈確士云縱橫跌宕能盤硬語

王孟端竹長卷

九龍山翁興豪放。手執蜿蜒青竹杖。酒酣怒擲江中流。化作一龍長數丈。一龍躍起一龍隨。倏忽羣龍駭奔浪。穿沙觸石連雲霧。頭角森森各相向。其間小者稱籜龍。鱗甲蛻盡風神同。人道此翁善劇戲。造化乃在指掌中。君不見九龍山翁去何許。九龍山上多風雨。素壁空堂杖影寒。夜半無人作龍語。

和韻答友人

百年為客興強半酒杯中。旅夜親燈影。江春憶釣蓬。才憐
皇甫湜。狂愛斛斯融。寂寞誰相問。惟應吾意同。三四澹遠有神

送攸縣陳醫官

雨過。澁江綠。春深。楚客歸。岸花隨路發。沙鳥背船飛。門對
孤峰秀。庭餘寸草暉。杏林多舊樹。應長去年圍。

直沽夜泊

二水斜通海。孤村合抱城。夜窗明月過。春浦暗潮生。憂國
身將遠。還家夢不驚。畱懽有親舊。羈旅見真情。

桑園阻風

離家凡十日。九日住風波。山色依篷轉。灘聲雜樹多。晝床
無穩臥。夜劍且悲歌。不有承顏樂。其如羈思何。風格老成

江南雨和寶慶韻

地溼蛇蟲聚。山深草樹多。野雲通晦朔。春雨亂江沱。薊北
無全麥。關西有荷戈。此時枯槁甚。相望隔懸河。

寄彭民望

斫地哀歌興未闌。歸來長鋏尚須彈。秋風布褐衣猶短。夜
雨江湖夢亦寒。木葉下時驚歲晚。人情閱盡見交難。長安
旅食淹畱地。慚愧先生苜蓿盤。澄懷云西涯七律不必奇句驚人自有羊叔子輕表

緩帶之度

與顧天錫夜話和畱別韻

路轉三湘去更深。潞河西岸澗東潄。潛鱗自足波濤地。別

明三才言選後集卷三十一
馬長懷秣飼心。湘女廟前山似黛。柳公亭下石如林。徵科亦是公家事。民力天南恐未禁。

送桑民懌訓導泰和

十年三度試春闈。親見聲華滿帝畿。甲第久慙唐李邵。奇才終誤宋劉幾。功名歲晚非蓬鬢。湖海官貧尚布衣。試看孤鷹下林落。高秋還向碧天飛。
按民懌恃才傲物。潦倒以終。西涯此詩。憐才之意。溢於言表。其相度如此。張芹輩乃文致其罪。幼之以立名。王九思作杜甫游春雜劇。擬之李林甫。真大氣不若矣。

和韻寄答陳汝礪掌教

寂寞天涯歎所依。海風江月意俱違。茱萸歲改身仍健。菖蒲秋荒馬不肥。白雪屢傳新調寡。青雲半覺舊人非。家山不隔長安路。應倚南樓望夕暉。

寄莊孔陽

買斷溪南十頃煙。還家無復夢朝天。身如元亮歸田日。詩似東坡過嶺年。蓬島謫來仙骨在。釣臺高處客星懸。三年未洗紅塵耳。誰聽清風石上絃。

西山

日照西山紫翠生。雨餘秋色更分明。蜃樓出霧東浮海。雉堞連雲北繞城。舊識郵亭猶問路。漸多僧寺豈知名。十年幾度登臨約。不盡平生吏隱情。

南園秋風

別苑臨城輦路開。天風昨夜起宮槐。秋隨萬馬嘶空至。曉送千旂拂地來。落鴈遠驚雲外浦。飛鷹欲下水邊臺。宸遊

睿藻年年事。況有長楊侍從才。似勝劉賓客始聞秋風詩

早發滄州

片帆輕舸發滄州。野樹離離散不收。兩地離心河上草。一燈殘夢渚西樓。塵生曉市人煙集。雲擁春城水氣浮。我欲憑高問歸雁。瀟湘何處可維舟。

與錢太守諸公遊岳麓寺席上作

危峰高瞰楚江干。路在羊腸第幾盤。萬樹松杉雙徑合。四山風雨一僧寒。平沙淺草連天遠。落日孤城隔水看。薊北湘南俱入眼。鷓鴣聲裏獨凭欄。朗健

用韻答邵國賢

種樹長安不作陰。幽居何處解冠襟。閒逢北客論山價。老

向南枝識鳥心。江水縱平終是險。惠峰雖好未為深。砥應

棹入荆谿去。遙聽吳歌答楚音。邵文莊言公嘗欲卜居宜興。讀此可見。

與趙夢麟諸人遊甘露寺

澗篠巖杉處處通。野寒吹雨墮空濛。垂藤路繞千年石。老鶴巢傾半夜風。淮浦樹來江口斷。金陵潮落海門空。關書未報三邊捷。萬里中原一望中。

九日渡江

秋風江口聽鳴榔。遠客歸心正渺茫。萬古乾坤此江水。百年風日幾重陽。煙中樹色浮瓜步。城上山形繞建康。直過真州更東下。夜深燈火宿維揚。通首渾雄三四從大江流日夜客心悲未央脫化

重經西涯

缺岸危橋斷復行。野人相見不通名。轆轤聲裏田田水。楊柳枝頭樹樹鶯。看竹東林無舊主。買山南國有新盟。不知城外春多少。芳草晴煙已滿城。放翁

春興

病懷愁緒鬱難裁。空望單于萬里臺。月落平沙南雁下。雪殘荒戍北花開。關山遠帶風塵色。閭幄誰當節制才。代馬不肥春草細。過河消息幾時來。

病中言懷

門掩疎籬雪滿池。夜寒惟有病先知。冰輪影薄當窗近。竹葉聲稀到枕遲。三徑業荒秋去後。十年心苦夢醒時。一身經濟元無術。醫國如今合付誰。想見西涯憂國心事

哭內弟劉釗

宦路年多改鬢毛。豈應容易着青袍。民貧况值饑荒後。政拙誰知撫字勞。遺恨可能忘骨肉。歸舟猶恐限風濤。空江落木傷心地。欲爲招魂賦楚騷。

泛南池有懷南溪聖公

輕舟別浦路迢遙。危石虛亭影動搖。雲去好山爭入座。雨來新水欲平橋。多情畱客空杯酒。舊事傷心但柳條。今日我來停短櫂。小山叢桂竟誰招。

匡山大忠祠

國亡不廢君。臣義莫道祥興是。靖康奔走恥隨燕。道路死生惟着宋。冠裳天南星斗空。淪落水底魚龍欲奮揚。此恨

到今猶不極。厓山東下海茫茫。

又有句云廟堂遺恨和戎策宗社深恩養土年

寄莊定山

六峰東面一江橫。此老逃名竟得名。山屋到秋經雨破。野航終日任潮生。消愁物已杯中辦。得意詩還枕上成。三十年前攜手地。寺門斜月晚鐘聲。

用韻答邃菴

嶽麓峰前湘水陰。思歸無計豁煩襟。亦知吳越非吾土。未必功名是我心。湖上青山隨處有。鏡中華髮逐年深。故人只在鄰州住。空谷他時聽足音。此西涯求退未遂之詩

寄莊孔陽

背郭誅茆草蓋堂。邊江種柳樹爲牆。舟中夢醒聞春雨。樓

上詩成坐夕陽南紀壯游餘歲月北扉遺草舊封章清時例有逃名客見說嚴陵本姓莊

見月

月色四千里。我行三見之。此回重見月。是我到家時。

舟次奉新驛得戴侍御同年書知於前驛相待漫得

二絕

月出高樓生野煙。斷堤疎柳驛門前。美人只在雙塘外。海口潮來好放船。

一櫂江南本舊期。宦途多事獨棲遲。東風幾度停舟意。惟有春潮日夜知。二詩脩然自遠

清明

舊壠蕭蕭楚水頭。每逢寒食憶松楸。匆匆便作江南客。又是并州一種愁。

原南草色動春晴。又是離家十日程。旋摘田蔬供野飯。晚風河上過清明。

過直河驛待明仲舟不至

隱隱青山帶落暉。河流東下我西歸。故人舟楫來何暮。莫遣溪風吹客衣。

格韻雙絕

附錄

楊一清六首

一清字應寧。其先雲南安寧人。父徙巴陵。應寧八歲能文。以奇童薦爲翰林秀才。年十四舉鄉試。登成化

八年進士。父喪。葬丹徒。遂家焉。服除。授中書舍人。遷山西按察僉事。以副使督學陝西。入爲太常卿。宏治十五年。用劉大夏薦。擢都察院左副都御史。督理陝西馬政。尋命巡撫陝西。總制三邊軍務。正德初。以擊破邊寇功。進右都御史。建議修築邊牆。以備警。帝從之。功未及。竟劉瑾惡其不附。已。應寧遂引疾歸。瑾誣以冒破邊費。逮下錦衣獄。大學士李東陽王鏊救之。得解。仍致仕。歸安化。王寘鐸反。東陽素知應寧力薦之。詔起總制軍務。西討中官張永。監其軍。旣擒寘鐸。應寧說永。因奏捷。見帝。極陳瑾奸狀。帝遂誅瑾。天下賴以安。拜戶部尙書。論功加太子少保。尋改吏部兼

武英殿大學士入參機務數上書極陳時政譏切近
倖爲江彬錢寧所搆力請骸骨歸從之帝南征幸應
寧第樂飲兩晝夜賦詩賡和以十數應寧因從容諷
止帝遂不爲江浙行世宗爲世子時興獻王嘗言楚
有三傑劉大夏李東陽及應寧也心識之及卽位廷
臣交薦應寧嘉靖三年詔以兵部尙書左都御史總
制陝西三邊軍務故相行邊自應寧始久之召還內
閣加少師兼太子太師吏部尙書華蓋殿大學士張
璉桂萼由議禮驟貴多事紛更應寧每裁抑之璉萼
大憾嗾其黨霍韜等誣應寧受張永弟賄劾之遂致
仕歸明年削其籍憤恚疽發背卒遺疏言身被污辱

死且不瞑帝亦尋悔之後數年復故官久之贈太保
諡文襄應寧博學善權變喜汲引士類海內爭趨其
門尤曉暢邊事羽書旁午一夕占十疏咸合機宜人
或訾已反薦揚之惟晚爲璉萼所軋不獲以恩禮終
然其才一時無兩或比之姚崇云所著有石淙類稿
四十五卷詩二十卷奏議三十卷西征日錄一卷車
駕幸第錄二卷

朱錫鬯曰邃菴古詩原本韓蘇近體一以陸放翁陳
簡齋爲師

汪端論曰文襄詩安和典麗自是雅音然視西涯則
絳灌之於韓彭矣竹垞謂出西涯之上豈篤論哉

甘涼道中書事感懷

弧矢威天下。雷霆震域中。大兵方出塞。小醜自相攻。繼絕
君王義。宣威將帥功。從今宵旰慮。不復在西戎。沈確土云
不復在西

山丹題壁

關山偏仄人蹤少。風雨蒼茫野色昏。萬里一身方獨往。百
年多事共誰論。東風四月初生草。落日孤城早閉門。記取
漢兵追寇地。沙場猶有未招魂。蒼涼似杜

將至寧夏

奉詔西征駐節時。元戎奏凱已先期。苗民自逆三旬命。嚴
猶何勞六月師。燈火家家開夜戶。弓刀隊隊捲風旗。益兵
加賦休重道。財力於今兩不支。

涼州

雉堞連雲十里城。相臣開府此屯兵。山連虎陣千年固。地
接龍沙一掌平。塞上馬嘶春草綠。村中人和凱歌聲。祇因
邊徼無烽火。忘卻關山是遠行。

喬希大司馬訪余石淙精舍

停雲回首意如何。揚子江頭一棹過。老去多情憐水石。閑
來開眼看風波。門牆舊侶凋應盡。燈火通宵話轉多。更約
扁舟和月宿。荻花深處聽漁歌。三四於不經
意中寓感慨

題畫送謝岐

有足不蹋風塵車。有手不草封禪書。茫茫天地誰知己。還

指梅花是故廬有奇氣

邵寶九首

寶字國賢無錫人三歲而孤事母至孝十歲母病爲文告天願減已算延母年母尋愈及長學於江浦莊景成化甲辰舉進士授許州知州月朔會諸生於學宮講明義利公私之辨躬課農桑倣朱子社倉立積散法行計口澆田法以備凶荒巫言龍骨出地中爲禍福國賢取骨毀於庭杖巫而遣之宏治七年入爲戶部員外郎歷郎中遷江西提學副使釋菜周元公祠修白鹿書院學舍處學者其教以致知力行爲本寧王宸濠索詩文峻卻之後宸濠敗人服其識遷浙

江按察使進湖廣布政使正德四年擢右副都御史總督漕運劉瑾擅政國賢絕不與通瑾怒漕帥平江伯陳熊欲使國賢劾之堅不可瑾黨劾熊併及國賢勒致仕去瑾誅起巡撫貴州遷戶部侍郎兼左僉都御史尋疏請終養歸御史唐鳳儀葉忠請用之畱都便養乃拜南京禮部尚書再疏辭免嘉靖中卒諡文莊國賢學以洛閩爲的嘗曰吾願爲真士大夫不願爲假道學舉南畿受知於李賓之爲文典重和雅一以賓之爲宗宏正時天下競尚李夢陽之學國賢獨守其師法確然不變所著有容春堂前後集續集別集共六十一卷又有左觴簡端錄學史錄日格子定

性書說漕政舉要許州志諸書

李賓之曰國賢詩該括情事摹寫景物極所欲言而無冗字長語

林待用曰國賢根榦宋儒標致秦漢莊以潔和以平紆徐容與辨博而不肆

陸道威曰錫山學脉開自龜山然在今時則邵文莊爲開山祖文莊事親最孝今邑紳多以孝聞者亦文莊有以風之也又曰文莊之生在陳白沙後而稍前於王陽明一時講學之風已盛公喜道學而未嘗標道學之目不喜假道學而未嘗辭道學之名循循勉勉爲所當爲而已此薛文清一派也後輩所極當效

法又曰文莊生平尤得力於文章蓋學於西涯西涯亦以衣鉢門生期之也其所著日格子亦似左國

汪端論曰文莊親炙西涯其詩樸而雅粹而婉溫然儒者之言勝於顧東江石文介集中感悼西涯之作至數十首想見眷眷師門雖東坡之於歐公莫能過也較王九思輩始則依附以沽時譽繼則培擊以博直聲君子小人之厚薄判然霄壤而羅景鳴請削門生之籍亦未免過激嗚呼視文莊可以知西涯矣

孫翊妻

夫死矣妾何敢生夫讐爲重身爲輕賊尙生妾何敢死軍中幸有報恩子號召如風赴如水斷賊頭祭夫墓白日下

高天何處黃泉路神似西

乞終養未許

乞歸未許奈親何。帝里風光夢裏過。三月春寒青草短。五湖天遠白雲多。客囊衣在縫猶密。驛騎書來字欲磨。聖主恩深臣分淺。百年心事兩蹉跎。澄懷云字字從至性中流出

寄林鎮江

歸興時來案牘邊。故山風景自年年。綠分一水橋南北。青擁羣峰屋後前。明月半窗空有夢。清風兩腋竟何緣。祇應獨上金山寺。吟倚滄江萬里天。

通州相城呈同事諸公

肩輿南浦復西邱。盡日淹留爲此州。雲隱層城纔見塔。水漫孤渡偶逢舟。林風力淺花能晚。山雨聲遲麥未秋。最是

中丞憂國計。幾回獨立向東流。中四句能寫歲歉人稀景象

寄崔民瞻

彬州南望楚雲邊。顏色長懷別我年。嶺北春從梅折後。衡陽書在雁歸前。雪淹夜榻無佳興。已巳冬在東朝房月照秋槎有勝緣。已丑秋在江西滕王閣病起萊衣方再舞。晚風吹雨過梅天。

用前韻答林鎮江

麻姑山下石磯邊。艤櫂逢君是此年。落月夢長千里外。歸雲心遠九峰前。東曹吏牘忙中事。南國詩筒病後緣。公暇漫從江郭眺。滄浪歌起白鷗天。

贈周松月

曉起空庭。月在松。惠山寺裏正鳴鐘。詩人訪我來何早。第七峰前。一短筇。天籟

贈錢校書

夫椒山前孤草亭。水風吹月秋冥冥。客來鶴去主人返。七十二峰湖上青。

聽松偶成

丁丑十月廿八日

秋深水國候來鴻。一夜悲涼見朔風。行徧冉涇無語者。聽松閣上哭涯翁。寶以西涯先生小像懸松風閣旬月一謁之。存此以見文莊事師之誠。

楊慎十四首

慎字用修新都人。大學士廷和子。幼警敏。年十二擬古戰場文。過秦論。長老驚異。入京賦黃葉詩。李東陽

見而嗟賞。令受業門下。正德辛未舉殿試第一。授翰林。修撰。十二年武宗微行。始出居庸關。用修抗疏切諫。尋移疾歸。世宗即位。起充經筵講官。嘉靖三年上議大禮疏。不報。及興獻帝去。本生號復。上疏爭。偕廷臣二百餘人伏左順門。力諫。又與王元正等撼門大哭。聲徹殿廷。帝震怒。逮下詔獄。廷杖者再絕。而復甦。謫戍雲南永昌衛。後父卒。告巡撫請於朝。獲歸視葬。葬訖。復還戍所。自是或歸蜀。或居滇。大吏咸善視之。世宗以議禮故。惡其父子。特甚。每問慎。作何狀。閣臣以老病對。乃稍解。用修聞之。益縱酒自放。及年七十。還蜀。巡撫遣四指揮以銀鎗逮之。還嘉靖三十八年。

卒年七十二所著有升菴詩文集八十一卷又有周
官音詁檀弓叢訓夏小正解春秋地名考經說轉注
古音略古音叢目古音獵要古音附錄古音餘古音
略例六書練証六書索隱古文韻語韻林原訓奇字
韻韻藻全蜀藝文志滇載記滇程記丹鉛總錄丹鉛
續錄丹鉛餘錄丹鉛新錄丹鉛閩錄卮言談苑醍醐
藝林伐山堦戶錄清暑錄莊子闕誤禪藻集禪林鉤
元古今雋尺牘清裁古今翰苑瓊琚風雅逸編選詩
外編五言律祖近體始音詩林振秀明詩鈔經義模
範升菴詩話墨池瑣錄書品斷碑集等書

王元美曰用修詩如暴富兒郎銅山金埒不曉喫飯
著衣又曰徐昌穀有六朝之才而無其學楊用修有
六朝之學而非其才又曰用修工於證經而疎於解
經詳於稗史而略於正史詳於時事而不得詩旨求
之宇宙之外而失之耳目之前

黃清甫曰用修喜用僻事多著浮彩搜羅刻削無出
其右而駢繪旣繁性情多盡傳謂美能沒禮詩亦有
之至誦其可憐風雨夜長在客塗中又江花與江草
異國看春生情境俱窮真堪隕淚

李時遠曰用修評他人詩精當不可假借其所作未
必如所評亦才人之通弊也

胡元瑞曰皇甫子循以六朝語入中唐調而清空無

跡揚用修以六朝語作初唐調而雕繪滿前故知詩
有別才學貴善用

宋轅文曰用修病在貪博故使事處往往求巧得拙
要其天才本是奇麗真如七寶流蘇

朱錫鬯曰元虞伯生告袁伯長云文章之妙惟浙中
庖者知之若川人之爲庖也麤塊而大鬱濃醃而厚
醬非不果然饜也而飲食之味微矣浙中之庖則不
然凡水陸之產皆擇取柔甘調其滑齊澄之有方而
潔之不已視之泠然水也而五味之和各得所求羽
毛鱗介之珍不易故性爲文之妙亦猶是耳讀用修
詩無異川人之庖矣予爲之調擇澄潔去其濃醃厚

醬蓋竊比於浙庖之義云

陸道威思辨錄曰議禮在朝廷甚難蓋既有拘忌又
有掣肘意見分爭私心角立從來議禮之家每稱聚
訟良有故也卽如近代興獻皇帝之事張璠桂萼始
議遠勝楊石齋諸君子然諸君子之心無私而張桂
之心則有私設以身處其時欲從諸君子則於禮不
可欲從張桂則跡類乎私而必爲諸君子所掎擊遂
一無可置喙矣時禮臣席書者王陽明之高足也以
大禮事質之陽明陽明不答爲詩曰無端禮樂紛紛
議誰與青天掃俗塵蓋深見諸君子爭禮之非而又
不敢倡議隨張桂之後也故愚謂此等大禮儒者皆

當於平居無事時考訂折衷著爲定說則後人可引以爲斷不至有臨事紛爭之患矣

趙雲松曰嘉靖中大禮之議天下後世皆是楊廷和而非張璁等明史傳讚獨謂廷和等徒泥司馬光程頤濮園之說英宗長育宮中名稱素定世宗奉詔嗣位承武宗後事勢各殊諸臣徒見先賢大儒成說可據而未準情酌理以求至當爭之愈力失之愈深此論真足破當時循聲附和之謬也按廷和等所據者漢定陶南頓及宋濮園三事漢成帝立定陶王爲皇太子立楚孝王孫景爲定陶共王後共王者太子本生父也此一據也漢光武中興先立四親廟推南頓

君以上至春陵節侯後以張純賈融等議乃以宣元成哀平五帝代四親廟而別爲南頓君立皇考廟此二據也宋仁宗立濮安懿王子於宮中爲皇太子是爲英宗英宗登極司馬光謂濮王宜尊以高官大爵稱皇伯而不名范鎮亦言陛下旣考仁宗若復以濮王爲考於義未當程頤又言爲人後者謂所後爲父母而謂所生爲伯父母此三據也不知漢哀帝宋英宗早經成帝仁宗預立爲子其不得考共王濮王固宜漢至哀平國統中絕光武崛起重復漢祚雖曰繼統實係創興原不必以宣元以下爲親廟其舍本生而立宣元以下親廟本漢儒之謬也卽立宣元親廟

矣而其別立南頓君廟亦仍曰皇考廟並未嘗去皇
考之稱也至如明世宗之入繼也以武宗無子而祖
訓有兄終弟及之義故世宗以倫序得立若以繼統
而卽當考所繼之君則宜考武宗矣以武宗從兄不
當考而考孝宗則又抹煞武宗一代矣孝宗在日自
有武宗並未嘗立世宗爲嗣也世宗之生在孝宗旣
崩之後並未嘗奉孝宗命爲嗣也故廷和草武宗傳
位遺詔亦但云皇考孝宗敬皇帝親弟興獻王長子
某倫序當立遵奉祖訓兄終弟及之文告於宗廟迎
嗣皇帝位其草世宗卽位詔亦云奉皇兄遺詔入奉
宗祧皆未敢明言以世宗爲孝宗子也而奈何使之

舍本生而考世父此本廷和等之自爲窒礙毋怪張
璉等之伺間也璉之論曰漢成帝之於哀帝宋仁宗
之於英宗皆預立爲嗣養之宮中其爲人後之義甚
明今武宗無嗣大臣遵祖訓以倫序立陛下何得與
預立爲嗣者同例而論哉方獻夫疏曰程頤濮議謂
英宗旣以仁宗爲父不當復以濮王爲親此非宋儒
之說不善實今日之事不同蓋仁宗嘗育英宗於宮
中孝宗未嘗立陛下於宮中孝宗未嘗以陛下爲後
陛下亦未嘗後孝宗也此二說者明白了當自爲千
古不易之論故其疏一出楊一清亦早心折之世徒
以考興獻者多小人考孝宗者多正人遂忘其立論

之是非折衷於至當此豈得爲篤論乎宋高宗將立
孝宗爲嗣命廷臣集議本生父封爵汪應辰定其稱
曰太子本生之親高宗親筆降曰皇太子所生父可
封秀王此何等光明正大高宗鞠孝宗於宮中命之
爲子尙不沒其本生父之稱況世宗由藩王入繼素
未有儲貳之稱乃欲使之舍生父而考世父乎可見
廷和等但拘濮議并高宗封秀王之事亦不及知此
廷和等之陋也自明史傳贊出而此事之是非始定
矣

汪端論曰升菴學殖宏富著作浩繁足稱一代才人
而於詩實未深造自謂得六代初唐之格然皆遺神

襲貌旣鮮雄渾之音儷白如青復乏清新之致兼以
英雄欺人好事剽竊如塞垣鷓鴣詞四聯中五用唐

人成句但竄易數字耳

按都護羽書飛瀚海單于獵
火照甘泉改高達夫句也馬

邑龍堆路十干改皇甫茂政句也誰起東山
安石臥爲君談笑靖烽煙改李青蓮句也塞下曲

夜夜月爲青塚鏡年年雪作黑山花則唐尉遲匡詩

也如是者指不勝僂就全集觀之其詩品不惟遠不
逮大復迪功尙在華泉子循子業之下 國朝王漁

洋沈歸愚諸公爲其盛名所懾推爲大家未云具眼

今錄其稍有風骨者十數章附西涯之後焉○集中

送余學官歸羅江七古歸愚推爲奇作然全用晉綿

州歌只自綴四語送行究非正格故不錄○升菴以

泣諫大禮謫竄遐荒直聲震天下至今人無異詞然
當楊介夫草武宗遺詔迎立世宗不早正繼統繼嗣
之名其後力爭固已晚矣升菴爲介夫子旣不能先
幾斷事匡父之失及張桂說行又不能援古引今出
於至當以折其角而默挽帝心乃徒逞血氣號召多
人市直沽名撼門慟哭夫處人骨肉事本至難而况
父子之間且在於天子乎積誠宛轉尙恐未易感孚
而可以驚激之舉脅成之乎介夫旣挾震主之威升
菴亦不免要君之跡卒至名卿碩士相率斃於杖戍
徒彰世宗之過於孝宗仍無所益且世宗末年芥視
羣下建言者笞辱誅夷曾不少貸此皆升菴父子有

以激之也至大禮之事後人議論不一各有偏袒惟
桴亭先生說最賅簡可稱持平趙雲松議貫串衆說
明暢切當因錄升菴詩並錄於右

三岔驛

三岔驛十字路北去南來幾朝暮朝見揚揚擁蓋來暮看
寂寂迴車去今古銷沈名利中短亭流水長亭樹

錦津舟中對酒別劉善充

錦江煙水星橋渡惜別愁攀江上樹青青楊柳故鄉遙渺
渺征人大荒去蘇武流離十九年誰傳書札上林邊北風
代馬南枝鳥腸斷當筵蜀國絃

賦得千山紅樹圖送楊茂之

蕭郎雅工金碧畫。愛畫碧雞與金馬。畫作千山紅樹圖。行
色秋光兩瀟灑。搖落深知宋玉悲。登山臨水送將歸。丹林
初曉清霜重。紫谷斜陽赤燒微。故人辭我故鄉去。滇樹遙
遙接巴樹。桑落他山共醉時。楓香客路消魂處。白首遐荒
老未還。流波落木慘離顏。錦城紅樹那能見。千里隨君夢
裏攀。沈確士云才人遠竄千古恨
事讀數詩令人百端交集

垂楊篇

靈和殿前豔陽時。忘憂館裏光風吹。千門萬戶旌旗色。九
陌三條雨露滋。蒼涼苑日籠燕甸。縹緲宮雲覆京縣。芳樹
重重歸院迷。飛花點點臨池見。臨池歸院總仙曹。應制分
題兢彩毫。詔乘西第將軍馬。詩奪東方學士袍。金明綠
畹煙霧舊。燕新鶯換朝暮。只知眉黛爲君顰。肯信腰肢有
人妒。從此沈淪萬里身。可憐憔悴幾經春。支離散木甘時
棄。攀折荒亭委路塵。搖落秋空上林遠。婆娑生意年華晚。
腸斷關山明月樓。一聲橫笛清霜坂。

秋日高峽早起

獨向高峽宿。遙聞水寺鐘。疎燈青耿壁。斜月翠沈峰。星點
螢穿竹。潮音鶴舞松。明湖開曉鏡。倒影木芙蓉。

春興錄一

天上風雲此際多。山中日月竟如何。爭傳鳴鳳巢阿閣。又
見飛鴻出罽羅。宣室鬼神思賈誼。中原將帥用廉頗。難教
遲暮從招隱。擬把生涯學醉歌。

嘉陵江

嘉陵江水向西流。亂石驚灘夜未休。崑崙蒼藤懸日月。崖
邊瑤草記春秋。板居未變先秦俗。剝木猶疑太古舟。三十
六程知遠近。試憑高處望刀州。

中秋禁中對月

漢家臺殿號明光。月滿秋高夜未央。銀箭金壺催漏水。仙
音法曲獻霓裳。路車天遠鸞聲靜。宮扇風多雉影涼。千里
可憐同此夕。美人迢遞隔西方。

武侯廟

劔江春水綠沄沄。五丈原頭日又曛。舊業未能歸後主。太
星先已落前軍。南陽祠宇空秋草。西蜀關山隔暮雲。正統

不慙傳萬古。莫將成敗論三分。
或云此升菴錄元人作

懷歸

星橋南望沈犀渚。雪嶺西連抱珥河。關塞渺茫魂夢隔。山
川迢遞別離多。汀洲春雨寒芳杜。茅屋秋風帶女蘿。心事
未從詹尹卜。生涯聊聽楚童歌。
又有句云江山平遠難爲畫雲物高寒易得秋亦佳

送周子庚都憲撫邊

蕭蕭戒嚴程。蕭蕭邊馬鳴。龍庭新節制。騎省舊才名。玉律
調秋氣。金鐃寢夜聲。隴雲笳外結。關月笛中明。鸞朔臨秦
障。鵝觚繞漢城。沙汀行見雁。海樹坐聞鶯。游霧懷前賞。歸
風遡別情。佇聽歌凱入。一舉塞垣清。

風雨

明三十家詩選初集卷三下
羅甸愁山雨。滇陽怯海風。可憐風雨夜。長在客途中。

寄遠曲

濯錦江頭煙水綠。相思萬里人如玉。瑤琴別後不曾彈。今朝纔理將歸曲。

望中條山

征馬長鳴向北風。峭關回首暮雲東。太行過盡中條出。一路青山白雪中。

明三十家詩選初集卷三下

錢塘 汪 端 允 莊 輯

李夢陽 四十首

夢陽字獻吉慶陽人父正官周王府教授徙居開封獻吉舉宏治癸丑進士授戶部主事遷員外以不得處館閣常怏怏不樂負氣使酒考滿日尙書侶鍾署其考曰一官不滿其心三差不終其事時人以爲實錄獻吉益憤適詔求直言乃上書陳二病三害六漸末言外戚壽寧侯張鶴齡罔利賊民鶴齡摘疏末陛下厚張氏語謂訕皇后帝不得已下夢陽錦衣獄旋釋之進郎中孝宗崩正德元年代韓文草奏劾劉瑾

等八闕瑾深憾之矯旨謫山西布政司經歷勒致仕
復摭他事逮下獄將殺之獻吉大懼書片紙曰對山
救我使婦弟左國玉持浼康海海爲說瑾乃免瑾誅
起原官遷江西提學副使久之坐凌轢同列挾制上
官爲大理卿燕忠奏罷冠帶閑住初寧王宸濠陰蓄
逆謀獻吉官副使時濠以其負盛名尤禮重之獻吉
因傾心相附濠嘗搆陽春書院僭稱離宮獻吉爲撰
記布政使鄭岳以正直忤濠獻吉與濠共搆其罪劾
去之及濠舉兵反伏誅御史周宣劾獻吉黨逆誣善
應斬大學士楊廷和尙書林俊力持之僅坐作書院
記削籍嘉靖十二年卒於家年五十九獻吉才思勁

鷲憫然謂天下無人宏治中宰相李東陽主文柄獻
吉初以師事之按空同集有吾師崛起楊與李力挽
一髮回千鈞之句可證楊謂楊一清也既而譏其萎弱不足法倡言復古文必秦漢詩必

盛唐非是弗道唐以後事不得用又專以摹仿爲主
謂今人摹臨古帖不嫌太似反曰能書詩文之道何
獨不然一時奉爲宗匠莫敢違言與何景明徐禎卿
邊貢王廷相康海王九思稱七才子名震海內後諸
人漸覺獻吉持論偏駁有規之者獻吉輒嫚罵故與
景明貢廷相海皆不終其好云有空同詩文集六十
六卷

何仲默曰詩必以盛唐爲尙宋人似蒼老而實疎鹵

元人似秀峻而實淺俗僕詩不免元習而空同諸作
間入於宋譬之于樂絲竹之音要眇木革之音殺直
若獨取殺直而并棄要眇之音何以感情飾聽也試
觀空同江西以後之作辭艱者意反近意苦者辭反
常讀之如搖鞞鐸耳

顧華玉曰空同言作詩必須學杜詩至於杜如至員
不能加規至方不能加矩矣此空同之過言也夫規
矩方員之至故匠者皆用之杜亦在規矩中耳何得
就以子美爲規矩邪
揚用修曰空同詩可傳者不在律空同之律少陵之
餘瀝遺肺耳

江進之曰空同滄溟二公固有復古之力然亦有泥
古之病被謂文非秦漢詩非漢魏盛唐不足法故事
凡出唐以下者皆不宜引用噫何其所見之隘也夫
詩人所引之物各因其時不相假借如睢鳩螽斯桑
扈蟋蟀樛木天桃芣苢葛藟是三百篇所用之物也
降而爲離騷則用芷蕙荃菼木蘭菊英蛟龍鳳皇文
虬赤螭曾有一物假借於毛詩乎又降而爲唐人之
詩則用岸柳江梅林花澗草鳴鳩乳燕獨鶴羣鴉曾
有一物假借於離騷乎非不欲假目到意隨意到筆
隨自不暇舍見在而他求耳至於引用故事則凡已
往之事與吾意互相發明者皆可引用不分今古不

論久近乃曰唐以上故事方用此特有見於兩漢六朝故事字眼古雅遂爲此言其實繫於用之善不善不繫於古不古也

湯養仍曰本朝古文當以宋景濂爲宗李獻吉李于鱗王元美氣力强弱巨細不同等贗文耳

邢子愿曰詩盛於前後七子以爲盡詞人之變矣然效趨者高趾促柱者急張往往不病而呻吟匪樂而强笑江河日下七子之盛七子之衰也

王貽上曰中山狼傳見馬中錫東田集東田正德間右都御史康對山李空同皆其門生也按對山集有讀中山狼傳詩云平生愛物未籌量那記當年救此

狼則此傳爲馬刺空同作無疑矣

頤道堂文集書李空同集後曰自明宏正以來皆稱李夢陽之詩爲復古其名冠於前後七子非直稱其詩也兼稱其人以爲正直忠鯁余讀其詩文核其本傳參以諸家所紀載蓋譎變狂謬者流無所謂正直忠鯁也方其應詔言事也劾外戚壽寧侯后母金夫人泣懇于帝而帝不肯予杖以洩宮闈之憤並切責壽寧則容善納諫之虛衷夢陽窺之稔矣旣而途遇壽寧侯乘醉詈之擊以馬箠折其二齒此甚類市井無賴所爲較之灌夫罵座更爲過之夢陽何爲而出此也然猶可曰氣質之偏也其代韓文起草劾劉瑾

也既爲瑾撫以他事下獄夢陽果不畏強禦則如劉
球楊椒山之殺身成仁可也何必以片紙呼對山救
我自惜其命而不愛他人之鼎彼對山者不自愛其
鼎而以徇人交失者也然猶可曰事有輕重權變也
其官江西提學副使以諸生故答淮王府校王奏之
詔下御史江萬實按治夢陽恐萬實右王遂訐萬實
詔下總督陳金行勘夢陽卽僞撰萬實劾金疏稿以
怒金金檄布政使鄭岳勘之岳賢者也夢陽又構岳
子云通賄事以要之此豈正直者所爲耶金畏其險
譎致有臣不敢復勘夢陽之奏詔遣大理卿燕忠往
鞫旣罷夢陽官亦褫岳職云坐行私有跡謫戍實則

寧王宸濠助夢陽劾岳所致也且宸濠何如人也淮
南吳凖之流逆節久著是以衡山却聘而不往子畏
佯狂而告歸夢陽負海內盛名乃爲撰陽春書院記
此豈陸游南園記之比且畫院中有李空同藩府宴
歸圖則當日之狎昵可見例以太白夜郎之流尙爲
輕縱亦旣冠帶閑住矣閉戶著書可也乃益跣跣負
氣治園池招賓客日從俠少射獵繁臺晉邱間自號
空同子何其豪也然此乃李將軍失職怏怏不得志
所爲文人出之學問之氣漸滅盡矣王元美謂其居
官日僚屬有不協者輒手批其頰宴客則自居上座
使客居下座此何禮也夫人有抹我之恩感之者人

情也不感則已屬昧心況負之乎考夢陽于壽寧侯之獄羅玘救之劉瑾之獄對山救之李西涯亦救之江西之獄何仲默救之宸濠之獄以黨逆爲御史周宣所劾大學士楊廷和尚書林俊皆力救之僅坐撰書院記削籍而中山狼樂府不免流傳於世或曰刺其負康對山也或曰負林見素也雖主名不定亦可見夢陽之負心爲不可沒也矧蹈于兄歐于姊厄于甥使非不近人情何至見殘骨月詩人溫厚乃乖戾若此耶卽其言詩亦甚乖謬詩宗漢魏似已然漢魏之詩不一家唐人宗少陵似已然唐之名家不少卽少陵詩亦不一格夢陽全以摹仿爲能夫摹仿則未

有不流爲剽竊者也觀其與徐氏論文書昌穀也駁何氏論文書仲默也以元白韓孟皮陸爲入市攫金登場角戲申柔澹沉著含蓄典厚之旨而薄俊語亮節豈知元非白比韓孟與皮陸不可同年語而仲默之所可自立者正在俊語亮節也又謂仲默必熟讀子昂必簡詩庶獲不遠之復否則終身野狐禪其命意尤使人不解然至今盛稱者何也曰夢陽詩尊杜論者多以爲少陵功臣則又不然少陵之詩元微之稱之李義山稱之嚴滄浪稱之宋元以來苟非大乖謬未有不稱之者不待夢陽也或以諸人但知尊杜不知學杜夢陽則學杜神似不知少陵詩所以獨經

者全在忠君愛國之心觸物感事油然而生不在佞
哀詐泣俚質生硬也唐之韓昌黎白香山李玉溪宋
之黃山谷陸放翁金之元遺山及明季之顧亭林陸
桴亭皆能師其意不師其詞斯爲善學杜者若以生
吞活剝爲學杜摹擬剽竊爲尊杜此則杜之罪人耳
何功之有又或以提倡七子爲夢陽功夫七子則自
有七子之本色在今觀諸人所作似夢陽者皆不佳
則夢陽之爲功亦僅而譽者不察之甚矣當日未嘗
無攻之者未中其窾要故愈攻而焰愈張明季首攻
之者莫如虞山然虞山祇在爭壇坫之名存心未公
是以燕伐燕也故摘訾其字句而於詩之是非均未

有得且未論其爲人近日袁趙諸人又統以七子連
類而譏不知七子詩有美有惡人亦有狂有狷而摹
擬剽竊之弊與桀驁乖僻之行惟夢陽爲獨盛余生
也晚雅不欲培擊前輩以爲高竊以詩之爲道以言
志非以立名牛耳騷壇實爲敝習夢陽所作未嘗無
雄駿之篇而摹仿者十九至其論詩純以意見爭勝
實不足以示後學若其素行由前觀之則尙屬僞君
子由後觀之則竟成真小人余恐後之學者學夢陽
詩而并學夢陽之爲人則有關於世道人心者甚鉅
故詳論之俾讀者有所考焉

又曰客難陳子曰子之責夢陽過矣夢陽詩不免摹

仿之病至其人倅直自好氣質之偏或有之其心術
則終不失爲君子子不觀其上孝宗二病三害六漸
之疏乎子何責之過也余應之曰夢陽一生亦祇有
此疏可取耳然其論元氣之病以大臣被彈得直之
後恬然仍作官爲非又以大臣親喪服闋不俟詔起
復爲無禮義廉恥何立言之過當也獨不觀其行事
乎宸濠之懷不軌也行道之人皆知之強奪民田億
萬計民保砦自固濠欲兵之鄭岳爲布政力持不可
一而止夢陽旣附濠濠遂助夢陽劾岳去之忠于爲國
者固如是乎考明史鄭岳本傳夢陽執岳親信吏偏
令言岳子沅受賄濠又爲夢陽囚掠沅構成其獄則

夢陽之罪浮於陸完諸人矣及濠敗中外交薦岳而
夢陽幾以黨逆誅免於誅者幸也其與楊一清書尙
以潛消跋扈之氣隱以自解可謂欺世而無忌憚者
也至陳金縱狼兵爲暴夢陽婉諷之可也正告之可
也力排而嚴劾之因以去官獲罪亦可也皆不出此
但令諸生見之毋拜以爲不畏強禦又以諸生與淮
王府校爭執校笞之諸生緣是益肆江萬實督責諸
生夢陽手銀鐺率諸生往鑱萬實萬實走免此非以
傲狠之凶德壞士習以壞風俗耶及夢陽羈廣信獄
諸生萬餘爲訟寃不聽劾復羣聚詈淮王及勘官豈
非陽以振士氣爲名而陰以植黨使凡爲提學者盡

如此士習尙可問耶夢陽廣信獄前後記及懼問記力辨已誣今觀其文大抵皆強詞奪理欲蓋彌彰劉健云夢陽狂妄小人耳燕忠云夢陽善許人陰私故人皆畏之可謂深知夢陽者王元美謂夢陽廣信之訟血氣與義氣各半蓋誤信夢陽諸記之自辨耳若朱睦㮮所撰夢陽本傳頗多曲筆與明史異或言此君子之過故爲諱之不知睦㮮本周王府鎮國中尉夢陽父正曾官王府教授故夢陽于周府蹤跡甚密此蓋阿私之言亦不足據也且夢陽大梁書院田碑云寧僞言欺世而不可使天下無信道之名寧矯情干譽而不可使天下無仗義之稱則其心術顯然畢

露非僅氣質之偏矣使其得志則僨事誤國必甚于王安石夢陽不見用明之大幸也子以上孝宗書謂夢陽爲君子此亦如匡衡之奏疏馬融之經術劉棻楚之犯顏極諫非無片善足錄而卒不免小人之歸何足爲夢陽解耶客曰是則然矣何李之競固兩人爭名也子獨罪夢陽無乃頗乎余曰仲默曾救夢陽夢陽先訾仲默仲默書多遜詞而夢陽復書則竟涉嫚罵在獄與仲默書備極情欸以冀援已旣得釋則排擠不遺餘力與周祚書所謂一二輕俊之士卽指仲默且其爭在江西獄解之後其曲直果安在也若仲默有爭名忌才之心則當快夢陽之死又何必委

曲以救之耶朱竹垞詩綜謂兩人名成之後互相詆
謩譬之針砭不中腠穴蓋誤以爲文人相輕習氣而
未揆當日之事理子奈何復沿其說哉客曰夢陽撰
內弟左國玉墓誌以說康海見瑾乃國玉之謀而已
不與信然乎余曰如是則對山救我四字何自而來
今固垂諸史冊也且無手書對山何肯救非見瑾何
能脫夢陽此亦情事之顯然者迨清夜捫心難逃公
議而故紆迴其辭非特欺國玉欺對山且欲欺天下
後世矣嘉靖初禮部主事豐坊隨其父學士熙泣諫
大禮受杖闕下頗著直聲及父卒成所坊乃言非父
本意忽走京師請追崇興獻王宜稱宗入太廟世宗

用其言而不錄其人於是爲清議所擯較夢陽之附
逆誣善事雖不同而墮節喪心則一也其晚年之恃
才凌物不知羞惡亦略相等人知坊之惡而不知夢
陽者以夢陽記醜言僞巧于文過飾非雖賢者亦爲
所惑也因并及之以待後之知人論世者

又曰客曰子論夢陽之爲人則誠然矣其詩規仿漢
魏宗法少陵體格甚正復古之功終不可沒也余曰
子亦嘗取夢陽全集細讀之乎其樂府君馬黃云大
兵拆屋梁中兵搖楣櫨小兵無所爲張勢罵蠻奴禽
言云東有木公西王婆姚源歌云我聞不敢以言舉
火來白及帳下離哉翻縣官走前奪驢後叫狗空城

雀云兩人恰欲抽身雀便復集豆娘子云豆卿子卿
娘子豆娘射潮引云此中云有鴟夷子何不張爾弓
挾爾矢射殺鴟夷潮可止甄氏女云棄妾忽如道妾
薄命云烏履雜蹂香澤傳五古雜詩云狐心生暗鬼
耳聞佯不知還南昌云瑤草爛孰掇又云陽鳥逝無
餘覲者鶯與鳧苦熱行云推案忽大叫蓐馭何時返
贈鄭生云溪魚白而躍登城東樓云蚊蟲撲面游月
夜云仲月元鳥集蚯蚓蟠于廬十二月朔云玉輦親
牛豕重瞳注鹿羣玩月云明月一何光信州茗云隨
風可傾國七古白楊行云落籜尙禁牛羊食汗穢頗
遭縣官打苦雨云兒驚屢叫安之乳又云疾電繞床

亂走鼠解酋行云縣官逃走驛官啼要錢勒酒仍要
雞示周生云吁嗟周生千萬駒今行不得如蟾蜍龍
沙行云高牙大纛苟不我和母壽云早起晏臥思慮
周鹽鼓醯醬咸經眸送人云君不見唐時鄭虔道高
坎壞腹無飯畫菊云突如大家貴介女贈何公云孔
明綸巾不離首羊祜輕裘僅掩膝送王封君云君亦
滾滾生公侯送董太僕云行卿官冷心不冷觀燈行
云借問幸臣誰云是李師師題吳偉畫云短褐垢臉
見天子嗚呼行云拖男抱女盡向北李進士醉歸圖
云汝昔出門驢無騎春游圖云東風只恁吹西湖送
田生云駕鶯鶯雁交踉蹌初度云我本與爾同肉血

五律晴云雲分天欲斷日晃地如伸郊園省水云雞
豚各惆悵鶯鴨爾能寬簡何舍人云司馬原牛走臥
龍會兔置南湖云湖僧騎牝馬生日云予豈那于飛
盱江云豈無罽不足聞砧云不盡擣衣魂鉛山云寒
葉痛紛紛霽云心攀作楚民雨雪云攤溼攪晨餐七
律于公廟會王帥云新晴借廟張金鼓舊約鋪筵集
縉紳石井云城促桑柘會欲落猗此可濯慙我纓牡
丹云不爲國姿寧用折翫傳賓手轉須嗟晚晴云歸
雲汎雨時間溼竝葉牽風對直翻葵花云見宜尊禮
莫欺黃憶梅云有蜂只恐垂垂翻新年云新年雨雪
亦太恁風雨云無愁天地無開明戊辰生日云春逼

河冰滾滾來雨雪云光牽五色黃煙動立春云風來
人面霎堪親七絕春日東園云情閑有時被物惱卽
無恚怒亦生嗔頻來語燕如疑主獨立鳴鳩不怕人
笋云汝雖天生剛直物豈容出地頭頭尖春日云今
番花開委難當花下云堪可鋪排無酒錢夷門曲云
獨樹花開特造次東莊云踏浪爭花何恁游又云迸
檻穿籬只恁驕又云撲酒衝琴特恁狂此等語庸惡
陋劣風雅掃地隨手掇拾已爛然盈紙矣若就其體
製而論沈歸愚明詩別裁謂夢陽五古宗法陳思康
樂過于雕刻未極自然其實豈止不自然而已七古
似詩者不過數篇餘則學杜有作賊傷事主之病何

仲默譏爲小兒倚壁能行否則仆地良非過苛七律
爲世所推不知最無足觀摹仿少陵皆其下駟及拘
體耳求其完善堪壓卷者指不能一再屈也至絕句
本非少陵所長亦復效之其無識不待言矣當時真
心推服夢陽者不過王維楨周祚黃省曾之流其詩
皆卑不足道是以高子業少受知夢陽而爲詩不宗
其說李川父亦以文受知後卽不屑附和其不足服
人可知已客曰徐昌穀非見夢陽後詩益工者乎王
李諸人不推夢陽爲宗主乎余曰昌穀之詩以五律
七絕爲最五律似孟襄陽七絕似劉賓客並未與夢
陽旨趣相同夢陽氣焰熏灼昌穀一言皮陸大受數

責遂不復與辨吳俗文弱詩人溫柔此昌穀之包容
夢陽耳文章煙月語原卑一見空同迥自奇乃漁洋
耳食之言蓋漁洋亦非深知此事是非者至鳳洲等
之推夢陽亦徒震于其名觀鳳洲晚年悔其少作日
手蘇子瞻集并譽李西涯樂府固已棄夢陽如土苴
矣若漢後無文唐後無詩之說江進之諸人頗能糾
摘其謬而夢陽隱衷迄未有窺見之者夫夢陽自叛
長沙之學倡言復古以震駭愚俗劫持一代文柄自
揣外強中乾體蕪識陋曾不中與韓歐蘇陸執鞭故
夫放厥詞一筆抹倒幸而漢魏世遠李杜名重否則
亦必彈射及之推擴其志卽秦政焚書坑儒之意何

斯編外傑作トシス

漢京篇

玄明宮行

以異茲然越數百年後終有發其覆者水落石出索然不見其所有則甚矣欺世盜名之術不可終恃也客語塞而退因并記之

內教場歌

內教場歌者李子紀時事而作者也帝自將練兵

於內庭

雕弓豹韃騎白馬大明門前馬不下徑入內伐鼓大同邪宣府邪將軍者許邪一武臣不習威柰彼四夷西內樹旗皇介夜馳鳴砲烈火嗟嗟辛苦二解

史烈女

史烈女者杞史氏之女也未嫁而死其夫是踰禮

以守信破經而成仁者也李子曰史氏女有激俗之功焉然予聞其言矣於定乎述

梨花如雪霜鴛鴦不成雙我心明如鏡我心清如水鏡明有塵時水覆無收理古昔華山畿行人下馬拜春風雨蛺蝶綠草搖衣帶

左袒行

陵曰不可平曰可安劉者誰勃與我產不信祿不入軍右袒計安出朱近修云此仿西涯樂府而作

雜詩

椽榱蝕以傾梁棟誠獨難流言播四國周公有疑患涼飈激頽景奄忽不可攀衆羽日續紘朱鳥戢其翰殺身苟無

益去去從所安。傷哉式微詩。千載起余歎。
茅以韜爲席。栢以勁爲薪。君子憂治世。愚者幸不辰。張置
以待兔。雉也蓄其身。物理雖云殊。罹脫各有因。浮沙卷奔
藿。朔吹揚驚塵。日暮臨大道。悵焉曷能陳。

雜詩

宛宛春田鳩。飛鳴柔且閑。一朝化爲鷹。肅肅厲羽翰。衆禽
不敢並。孤立秋雲端。鳥旣不自知。人胡究其然。

自大過渡河趨陂沙岡

凌春遠行邁。游目恣沿越。漸辨林中曙。遽失霞上月。觸物
誰爲情。悲歎曷可歇。載登隋疆場。况眺宋城闕。陽坡散初
柳。陰曲峙寒雪。只此判氣候。豈必殊燕粵。潛潛濁河駛。晏

晏晨風發揚帆。截驚瀨倚棹。望窮髮。鳧雁眇難卽。汀蘭翠
堪結。美人旣莫期。天路復幽絕。陂岡鬱參錯。岸沙皓明滅。
日暮孤雲興。何以慰忡悒。

赴懷玉山作

始臨清溪寺。不謂茲路艱。崎嶇踰南嶺。轉見山鬱盤。重陰
起北谷。凍雨響前巒。志定邁孰禦。勇往竟孤攀。挽葛接懸
狖。架木凌澧湍。律律巖壑變。颯颯嵐風寒。隔港望絕岫。岑
岑已雲端。

湘妃怨

采蘭湘北沚。攀木飛南潯。淥水含瑤彩。微風託玉音。雲起
蒼梧夕。日落洞庭陰。不知篔簹竹。苦惟見淚斑。深

宋轅文
云深秀

贈謝子

涼風吹海月。當酒墮我懷。愛此皎潔光。願與君子偕攬之。
不入手。仰面看昭回。銀潢南北流。竟夕但徘徊。

送何舍人齋詔南紀諸鎮

先皇乘龍去不返。悲風慘淡吹宸極。四海哭若喪慈母。百
官狂走天爲黑。憶昨臨危坐御床。手挈神器歸今皇。密語
丁寧肺腑裂。三老新聞眼流血。金膝立剖石室秘。此事難
從外人說。我君謙讓不可得。割哀踐阼宏祖烈。日月重懸
萬國朝。雷雨赦過羣方悅。越南海北霹靂動。蠻夷盡奉王
正月。此時九道使臣出。舍人亦輟螭頭筆。白馬朝騰薊北
雲。錦帆暮閃江沱日。江沱秋交多烈風。洞庭雲夢俱眼空。

巴陵縣令舍人兄接詔會弟西樓中。童年題詩在高壁。六
載不到紗爲籠。南嶽以南惟峻山。苦蒸毒霧何盤盤。天王
新令雷電掣。妖蛇不敢啼林端。五溪官長喘喙拜。黔州父
老垂淚看。却瞻蒼梧雲。氣黑斑竹。臨江怨幽色。翠華縹緲
空冥間。此時此恨誰知得。君不見馬援柱孔明碑。剝落黃
蒿裏。千年莓苔待君洗。萬里之行自此始。歸來何以獻天
子。

上元訪杜鍊師

宣皇昔時乘八風。御龍遊戲行煙空。馬前兩兩侍玉女。別
館多在蓬萊宮。朝天宮中舊時殿。樓臺畫鎖無人見。琉璃
井塌青苔滿。松柏森森月如練。嗚呼往事難具陳。燈火如

山又一春。北斗壇西訪隱淪。我師黃衫白氍毹，坐我更致
西樓賓。玉杯潑灑赤瑪瑙，織罽四角銀麒麟。酒肉山堆滿
堂醉，仙厨往往來八珍。孝宗之朝五真人，師也磊落當其
倫。自言召見親賜食，曾把丹書獻紫宸。如今寂寞看春色，
銀魚玉帶無消息。豈惟魚帶無消息，欲語吞聲淚沾臆。勸
師對此莫酸辛，世間萬事如轉輪。且將芝草供生計，聊與
煙霞作主人。月偏彩雲當牖生，旋呼兩童吹玉笙。聞師妙
得逡巡術，百壺倒盡還須傾。古來仙子尚誰在，飲者翻垂
千載名。名垂千載亦區區，酒闌燈昏夜復徂。不見秦陵草
已宿，春生樹啼雙老烏。此時亦應羣帝趨，金燈翠旗光有
無。沈確士云：故君之思，寫得神靈恍惚。

奉送大司馬劉公歸東山草堂歌

東山有草堂，縹緲雲嶠孤。前對祝融峰，下瞰巴陵湖。明公
昔時此堂居，麋鹿熊豕當窗趨。洞庭日落風浪湧，倒影射
堂堂。欲動慘淡誰聞紫芝曲，獨善不救蒼生哭。先帝親裁
五色詔，老臣曾受三朝祿。此時邊徼多戰聲，曳履謁帝登
承明。謝安笑却淮淝敵，魏相坐測單于兵。九重移榻數召
見，夾城日高未下殿。英謀密語人不知，左右微聞至尊羨。
自從龍去不可攀，公亦臥病思東山。湘娥含笑倚竹立，山
鬼窈窕堂之側。上書苦死只欲歸，聖旨優容意悽惻。內府
盤螭縷金織，賜出傾朝皆動色。白金之鉉紅粟記，寶鈔生
硬鴉翎黑。崇文城門水雲白，是日觀者塗路塞。城中冠蓋

盡追送塵埃不見長安陌。人生富貴豈有極。男兒要在能
死國。不爾抽身早。亦得君不見漢二疏。千載想慕傳畫圖。
卽如草堂何處無。祿食覩竊胡爲乎。乃知我公眞丈夫。嗚
呼乃知我公眞丈夫。沈確士云英謀密語十四字是孝宗實錄

朝飲馬送陳子出塞

朝飲馬。夕飲馬。水鹹草枯馬不食。行人痛哭長城下。城邊
白骨借問誰。云是今年築城者。但道辭家別六親。寧知九
死無還身。不惜身爲城下土。所恨功成賞別人。去年賊掠
開城縣。黑山血迸單于箭。萬里黃塵哭震天。城門晝閉無
人戰。今年下令修築邊。丁夫半死長城前。城南城北秋草
白。愁雲日暮鳴胡鞭。

右將軍戰場歌

清風店南逢父老。告我已巳年間事。店北猶存古戰場。遺
鏃尙帶勤王字。憶昔蒙塵實慘怛。反覆勢如風雨至。紫荆
關頭晝吹角。殺氣軍聲滿幽朔。胡兒飲馬彰義門。烽火夜
照燕山雲。內有子尙書。外有石將軍。石家官軍若雷電。天
清野曠來酣戰。朝廷旣失紫荆關。吾民豈保清風店。牽爺
負子無處逃。哭聲震天風怒號。兒女床頭伏鼓角。野人屋
上看旌旄。將軍此時挺戈出。殺敵不異草與蒿。追北歸來
血洗刀。白日不動蒼天高。萬里煙塵一劒掃。父子英雄古
來少。單于痛哭倒馬關。羯奴半死飛狐道。處處懽聲噪鼓
旗。家家牛酒犒王師。休誇漢室嫖姚將。豈說唐朝郭子儀。

沉吟此事六十春。此地經過淚滿巾。黃雲落日古骨白。沙礫慘淡愁行人。行人來折戰場柳。下馬坐望居庸口。却憶千官迎駕初。千乘萬騎下皇都。乾坤得見中興主。日月重開再造圖。梟雄不數雲臺士。楊石齊名天下無。嗚呼楊石。今已無。安得再生此輩西備胡。澄懷按石亭以悖逆被誅。且讒忠肅公至死詩中此例失倫歸愚雖曲為回護終不可掩詩中因有警句姑存之。

漢江歌送友之桂陽

漢江江上鷓鴣鳴。漢江游客無限情。青山落日下帆影。芳草月明聞櫂聲。黃鶴磯頭暮雲盡。鸚鵡洲邊春水生。莫倚仲宣能作賦。洞庭南接桂陽城。

林良畫兩角鷹歌

百餘年來畫禽鳥後有口紀前邊昭一子工似不工意吮筆決皆分毫毛。林良寫鳥祇用墨。開縑半掃風雲黑。水禽陸禽各臻妙。掛出滿堂皆動色。空山古林江怒濤。兩鷹突出霜崖高。整骨刷羽意勢動。四壁六月生秋飈。一鷹下視睛不轉。已知兩眼無秋毫。一鷹掉頸復欲下。漸覺颭颭開風毛。匹絹雖慘淡殺氣不可滅。戴角森森爪拳鐵。迥如愁胡昔欲裂。朔雲吹沙秋草黃。安得臂爾騎駟鐵。草間妖鳥盡擊死。萬里晴空灑毛血。我聞宋徽宗亦善貌。此鷹後來失天子。餓死五國城。乃知圖寫小人藝。工意工似皆虛名。校獵馳騁亦末事。外作禽荒古有經。今皇恭默罷游燕。講經日御文華殿。南海西湖馳道荒。獵師虞長俱貧賤。呂紀

白首金爐邊。日暮還家無酒錢。從來上智不貴物。淫巧豈敢陳。王前良乎。良乎寧使爾畫不直錢。無令後世好畫兼好畋。此詩可謂空同七古。壓卷而摹杜有痕。終不免努力嚼齒之狀。仲默所以有古人影子之語也。他若士兵行豆莖行等篇。優孟衣冠。元明宮一首。累句尤甚。茲選槩從芟棄。

去婦詞

正德元年戶部尚書韓文暨內閣師保等咸相繼去位。李子作此詞也。

孔雀南飛雁北翔。含顰攬涕下君堂。繡幙空留並菡萏。羅袂尚帶雙鴛鴦。菡萏鴛鴦誰不羨。人生一別何由見。只解黃金頃刻成。那知碧海須臾變。賤妾甘爲覆地水。郎君忍作離弦箭。憶昔嫁來花滿天。賤妾郎君俱少年。瑤臺築就

猶嫌惡。金屋粧成不論錢。重樓複道天中起。結綺臨春照春水。宛轉流蘇夜月前。萋迷寶瑟煙花裏。夜月煙花不相待。安得朱顏常不改。若使相逢無別離。肯放馳波到東海。薄命難交姊妹知。衰年恨少姑嫜在。長安大道接燕川。鄰里攜壺舊路邊。妾悲妾怨憑誰省。君舞君歌空自憐。郎君豈是會稽守。賤妾寧同會稽婦。郎乎幸愛千金軀。但願新人故不如。沈確士云深婉可以怨矣。

送李帥之雲中

黃風北來雲氣惡。雲州健兒夜吹角。將軍按劍坐待曙。紇干山搖月半落。槽頭馬鳴士飯飽。昔無完衣今繡襖。沙場緩轡行射鵬。秋草滿地單于逃。

環縣道中

西人習鞍馬而我憚孤征。水抱琵琶塞。山銜木鉢城。裏瘡
新罷戰。插羽又徵兵。不到窮邊處。那知遠戍情。

明遠樓春望

貢院初開閣。春陰獨倚欄。柳邊千艦聚。花裏萬家殘。風雨
江聲壯。兵戈地色寒。斷腸沙雁北。羣起向長安。蔣仲舒云
含愁無限

酬京師友人

浮雲悲故國。積水起鳴雷。不見長安日。愁登古吹臺。故人
三月別。天上一書來。欲問經行處。山中杜若開。

得何子過湖南消息

及遇荆門信。洞庭秋已淒。湘江饒苦竹。幾聽鷓鴣啼。馬援

雷銅柱王褒祀碧雞。向南衝瘴癘。藥物去曾攜。

泰山

俯首無齊魯。東瞻海似杯。斗然一峰上。不信萬山開。日抱
扶桑躍。天橫碣石來。君看秦始後。仍有漢皇臺。

讀直道陳公祚遺事

上主能容直。當言敢顧身。累朝傳諫疏。萬死作歸人。古廟
穠花曉。孤墳勁草春。從來汨沒士。特筆在詞臣。

河上秋興

十載宋梁間。雞鳴望四關。月來天似水。雲起樹為山。朝市
今何處。流波去不還。高秋未歸客。腸斷濁涇灣。

雪後朝天宮

馬上城中見雪山。白雲蒼霧滿燕關。蓬萊咫尺無人到。松柏黃昏有鶴還。當日翠華游物外。百年金殿鎖人間。浮塵擾擾江湖遠。悵望巖棲不可攀。

良嶽

宋家行殿此山頭。千載來人水一邱。到眼黃蒿元玉砌。傷心錦纜有漁舟。金縉社稷和戎日。花石君臣棄國秋。漫倚南雲望南土。古今龍戰是中州。沈確士云人知南渡之庸懦而不知覆亡之禍原于徽宗君臣之宴樂也五六語藏得議論。澄懷按空同尚有靈武臺一首歸愚亦盛推之然立論未允不足取也

潼關

咸東天險設重關。閃日旌旗虎豹閒。隘地黃河吞渭水。炎天白雪壓秦山。舊京想像千官入。餘恨逡巡六國還。滿眼

非無棄繻者。寄言軍吏莫嗔顏。

瀑壑晚坐

醉踏匡山晚未遲。翠巖丹壑凜秋姿。峰高瀑布天齊落。峽靜星河夜倒垂。遠害欲尋麋鹿伴。暫羈終與世人辭。磨崖徧剔蒼苔讀。獨坐雲松有所思。

出塞

黃河水遶漢宮牆。河上秋風雁幾行。客子過壕追野馬。將軍韜箭射天狼。黃塵古渡迷飛輓。白月橫空冷戰場。聞道朔方多勇略。只今誰是郭汾陽。一起高亮

九日寄何舍人仲默

九日無朋花自開。登樓獨酌當登臺。孤城落木天邊下。萬

里浮雲江上來。但遣清尊常不負。從教白髮暗相催。梁南楚北無消息。塞雁風高首重回。

限韻贈黃子

禁垣春日紫煙重。子昔爲雲我作龍。有酒每邀東省月。退朝會對掖門松。十年放逐同梁苑。中夜悲歌泣孝宗。老體幸強黃犢健。柳吟花醉莫辭從。

東莊藩司諸公見過

少年湖海老中原。萬里誰期共一尊。避遘路歧須盡醉。向來離合敢重論。桑麻事業陶公徑。烏雀人情翟氏門。懶散廢書瓜可種。夜來時雨足吾園。真至渾成空同。集中有數之作。

臺寺夏日

古臺高並鬱岩。巖巖斷瑤瑤。積層鎖寂寥。積雪洞門常慘慘。炎天松柏轉蕭蕭。雲雷畫壁丹青壯。神鬼虛堂世代遙。惆悵未宮偏泯滅。二靈哀怨不堪招。

吹臺春日古懷

廢苑迢迢入草萊。百年懷古一登臺。天雷李杜詩篇在地。歷金元戰陣來。流水浸城隋柳盡。行宮爲寺汴花開。白頭吟望黃鸝暮。瓠子歌殘無限哀。

贈何舍人

朝逢康王城。暮送大堤口。相對無一言。含悽各分手。

聖節聞駕出塞

千官北首望龍旗。萬國車書集鳳闈。八駿穆王秋色遠。幾

時。纓。擁。白。狼。歸。

夏日夜泊別友人

黃鶴樓前日欲低。漢陽城樹亂烏啼。孤舟夜泊東遊客。恨殺長江不向西。

歸途覽詠古蹟并追記百泉遊事

河濟誰言不共流。青春惡浪古懷州。蕩搖少室三花樹。倒映天壇白石樓。

汴中元夕

中山孺子倚新粧。鄭女燕姬獨擅場。齊唱憲王春樂府。金梁橋外月如霜。自然華妙

附錄

尹耕五首

耕字子莘蔚州人。性豪宕。喜談兵。舉嘉靖壬辰進士。由兵部郎中出知河間府。升河南按察僉事。坐事被劾。戍遼。左卒有朔野集。

朱錫鬯曰。李何詩派。並行曾未幾時。而學李者漸少。宗何者日多。學李得其風骨者。前有凌谿。後有朔野。而已。朔野以邊才自命。一蹶不振。坎壈而終。詩如曉角秋笳。聽者悽楚。

汪端論曰。子莘七律。源出空同。然空同每多敗筆。子莘整肅。頗似過之。錄數章以見其槩。

秋興

薊門千里接雲中。曠騎清宵警報同。合陣幾窺青海月。鳴鞭爭下黑山風。殘冬戰士衣仍薄。荒歲孤城廩欲空。南國十年輸輓盡。防秋諸將漫論功。

十萬鳴弦報吉囊。野心狼子是花當。連姻故自輕中國。分道頻看入漢疆。推轂丈人空肉食。操戈遺孽尙蕭牆。不應干羽修文日。歲歲三關有戰場。

威名萬里馬將軍。白首丹心天下聞。遼水旌旗餘殺氣。秦山松柏已高墳。條侯自靖中山變。實憲曾銘塞外勲。獨倚凌煙思將略。暮天征雁下孤雲。

紫荊關

漢家鎖鑰惟元塞。隘地旌旗見紫荊。斥埃直通沙磧外。

樓高並朔雲。平峰巒百轉。真無路。草木千盤盡。作兵誰識廟堂柔。遠意戟門煙。雨試春耕。沈確士云。諸詠得少陵遺意。但少開闢變化。所以不逮古人。

贈張西屏

月明熊耳照滹沱。千里思君可奈何。碁局擬從清夢著。詩篇遙向白雲歌。時危身世風霜苦。日短江湖感慨多。莫道塞翁常失馬。後車還許載漁蓑。

封事曰義子不當畜宦官不當寵報聞久之轉吏部員外出爲陝西提學副使用經學課士秦俗化之嘉靖元年以疾投劾歸尋卒年三十九有大復山人詩文集三十八卷雍大記三十六卷

三元美曰仲默詩如朝霞點水芙蓉試風又如毛嫱西施無論才藝却扇一顧粉黛無色

穆敬甫曰何詩清淑典麗鑑然瑩然真得風人溫柔敦厚之旨

任少海曰仲默如黃鐘在縣金石發作伶坊供奉之官莫不按宮商謹節奏其橫放雄健處如項羽提三尺劍出江東不必斬將舉旗而登壇嘯咤千人皆廢

胡元瑞曰今人因獻吉祖襲杜意輒假仲默舍筏登岸之說動以雞口牛後爲辭此未覩何集者就仲默言古詩全法漢魏歌行短篇法杜長篇法王楊四子五七言律法杜之宏麗而兼高岑王李之秀朗卒自成一家冠冕當代所謂門戶堂奧不過如此古人影子之說因獻吉多用杜成句故有此規自是葯石非欲其盡棄根源別安面目也又曰李以骨力勝何以神韻超學何不至不失雕龍學李不成終類畫虎黃清甫曰大復詩因意著詞就詞成篇故情性冲逸興象閑雅

顧玄言曰大復詞采秀逸如劍閣朝霞石門寒瀑空

中聲色高遠難攀

李伯華曰大復詩宗李杜文仿班馬字兼顏柳或與李空同邊華泉稱爲海內三才或與崔後渠稱爲中州二俊或與李邊及徐迪功稱爲宏正四傑

陳臥子曰昔人稱王恭濯濯如春月柳又評褚書爲瑤臺嬋娟仲默詩庶幾近之

孫豹人曰大復五古句琢字鍊長歌滔滔洪遠又復清爽絕倫五律全法右丞清和雅正七律自少陵以外無所不擬絕句獨不摹盛唐秀峻莫比要之驟而如淺復而彌深兩言其定評矣未嘗不贊其妙也
朱錫鬯曰宏正間作者倡復古學李何寔爲之長兩

家壁壘屹不相下薛君采詩云俊逸終憐何大復麤豪不解李空同自此詩出而抑李申何者日漸多矣王貽上曰胡元瑞論明人歌行極尊空同而畧於大復不知何送徐少參津市打魚畫馬吳偉飛泉獵圖諸作深得少陵之髓特以秀色掩之耳胡專舉明月帝京陋矣

汪端論曰大復天才高曠體被文質五言擷三謝之菁英近體臻嘉州之堂奧本不必以學杜爲重惟七古及在京時律詩法杜之氣格而不規撫字句雄深宕逸時或近之度越空同奚止十倍余嘗與澄懷共論李何得失以爲空同學杜新莽之於周公也大復

斯倫外之傑作
大梁行

學杜王景畧之於諸葛武侯也前後七子自當以大復為冠試取諸人詩平心讀之自見矣○七古中有仿初唐四子體以聲調勝者乃其一時佇興未云極詣石川子歌等作則更墮矜誇標榜之習茲選十存一二焉○大復答空同書謂詩溺於陶文亾于韓誠為繆論宜遭後人詬厲然其詩自工并此訾之母乃太苛

短歌行

冉冉秋序。肅肅霜露。蓄我旨酒。召我親故。烏歡同林。水歡同源。矧我同鄉。胡能弗敦。耀靈西藏。明燈在室。更長夜良。可以繼日。園有藝菊。庭有樹蘭。秋芳是悅。春榮曷觀。高陵

可升海水。可測出門。異路安知。南北生年。幾何。去者日多。子不我樂。聽我短歌。陳臥于云弱於曹公壯於子桓

獨漉篇

獨漉獨漉。驅車折軸。不畏折軸。但畏車覆。芑芑者。薺生彼中。衢雖有蘭蕙。當門則鉏。同行竊金。相顧道左。我實不知。彼則畏我。食荼知苦。食梅知酸。狐裘之敝。可以禦寒。有虎斑斑。伏于林下。我欲射虎。愧無勁弩。肅彼北風。渡彼中流。豈不懷憂。與子同舟。宗子相云絕似古逸詩

塘上行

蒲生寒塘。流日與浮萍。儔風波搖其根。飄轉似客遊。客遊在萬里。日夕望故州。鴉鳩鳴歲暮。蟋蟀知涼秋。暑退厭絺

裕寒至思重裘。佳人不與處。圓鬼忽四周。房櫳淒鳴玉。統
素誰爲收。白雲如車蓋。冉冉東北浮。安得雲中雁。尺帛寄
離愁。陳臥子云婉麗清發不在建安下

下陵曲

上陵風以雨。下陵月星露。不見西陵宮。但見松柏樹。

艷曲

御溝連上苑。大道接平沙。紫陌三千騎。青樓十萬家。城中
楊柳樹。風起暮飛花。六朝佳製

瑤瑟怨

美人竹間亭。虛簾空月華。相思湘江曲。淚竹生斑花。花開
爲誰好。花落不復掃。出戶見春風。低頭怨芳草。坐彈五十

絃。起視江月殘。愁絃不堪聽。手澁金雁寒。一彈正淒切。再
彈轉嗚咽。三彈撥幽腸。聲亂冰絲結。西風吹芙蓉。一夜落
舊紅。豈知瑤瑟音。能消青鏡容。

雙燕篇

雙燕何翩翩。飛去仍徊翔。依依止畫閣。繾綣鳴東廂。昔來
屈陽節。今去易寒涼。祇恐秋風高。海路多煙霜。雙飛入君
戶。雙栖在君梁。被蒙君仁惠。彈射不相妨。養雛毛羽成。送
雛還故鄉。雖無黃雀報。歲願巢君堂。温厚

種麻篇

種麻冀滿邱。種葵冀滿園。孤生易憔悴。獨立多憂患。當行
思故旅。當食思故歡。先機失所豫。臨事徒嗟嘆。升蕭艾。乃

至鉏桂致傷蘭。物理有相附。疇能識其端。斷金俟同志。抱玉難自宣。交結良匪易。君當圖未然。陳臥子云陳思君子之遺

行路難

床有織綺。篋有織素。請君視綺。還視素。憐新不如莫棄。故樽中有酒盤。有殮聽我為歌。行路難。眾中歡樂多。志氣豈知他人不得意。白日有時不照地。安得保君常不棄。陳臥子云

結句無嫌質直樂府本色也

天河熒熒西北轉。織女牽牛不相見。由來天上亦別離。何怪人間有悲怨。世情磷薄惡衰賤。駕車騎馬有人羨。少年不得君愛惜。紅顏勝人亦何益。吳明卿云悽婉

明妃引

明妃絕色世無鄰。粉黛那數三千人。咫尺宮門接前殿。君王只向圖中見。當時自恃如花容。美醜誰知由畫工。單于日近漢日遠。萬里風沙竟不返。琵琶馬上再三彈。翠袖朝啼關塞寒。皓齒明眸葬胡地。千秋遺曲猶悲酸。燕支暮雲白皓皓。胡兒吹笳雪飛早。山前孤塚高嵯峨。歲歲春風長青草。古來抱節本難遇。況復蛾眉人所妬。君不見長門宮不用黃金買詞賦。縱有朱顏君不顧。

採蓮曲

岸上有柳。隰中有荷。舟中女兒勝吳娥。為君先唱綠水歌。起攬長帶垂織羅。鴛鴦雙棲翡翠過。下渚日暮多風波。葉密花稀愁奈何。

急歌太短。緩歌長。清風夕迴。素雲翔。雙鳧飛起。向橫塘。荷花不言空斷腸。明月宛轉流西方。月中白露沾衣裳。紅顏青鬢安能常。萬歲為樂莫相忘。

俠客行

朝入主人門。暮入主人門。思殺主仇。謝主恩。主人張燈夜。開宴千金為壽。百金餞秋堂。露下月出高。起視廐中有駿馬。匣中有寶刀。拔刀躍馬門前路。投主黃金去不顧。沈確云生氣全湧。勁節亦健勁。

秋江詞

煙渺渺。碧波遠。白露晞。翠莎晚。泛綠漪。蒹葭淺。浦風吹帽。寒髮短。美人立江中。流暮雨。帆檣江上。舟夕陽。簾櫳江上。

樓舟中採蓮。紅藕香樓前。踏翠芳草。愁芳草。愁西風起。芙蓉花落。秋水沈確。士云美人娟娟隔秋水。風度似之。温飛卿樂府過於旖旎。詩格轉不逮也。

竹枝詞

十二峯頭秋草荒。冷煙寒月過瞿塘。青楓江上孤舟客。不聽猿聲亦斷腸。絕唱

易水行

寒風夕吹易水波。漸離擊筑荆卿歌。白衣灑淚當祖路。日落登車去不顧。秦王殿上開地圖。舞陽色沮那敢呼。手持匕首摘銅柱。事已不成空罵倨。噫嗟嗟。燕丹寡謀當滅身。光也白刎何足云。惜哉枉殺樊將軍。沈確士云三語千古斷案。

莫羅燕

羅雀莫羅燕。燕飛在高殿。殿高且深誰得見。主人垂幕高
殿中。燕來徘徊不敢通。楊花落。燕出啄童子。張羅逐黃雀。
黃雀入羅。燕入幕。古格古意

擬古詩

淒淒仲秋日。百卉腓以殘。涼風入階樹。零露摧庭蘭。明月
皎東壁。昆虫鳴草間。孤鴻暮安適。哀音揚雲端。言眷平生
友。振翮起孤鶩。遺我若逝波。望子如高山。託忱在終始。蓄
久諒逾宣。寸心不可移。磐石誰謂堅。

詠懷

寂寂沅湘流。長江上有楓。青蕙綠廣隰。綠蘅被洲中。揚舲
泝煙沚。遙瞻二妃宮。二妃何婉孌。舉馨振微風。解佩遺下

女。將以明我衷。光采不易合。精誠渺難通。浮雲蔽江皋。白
日忽已晚。還顧蒼梧原。何時翠華返。婉而多風

桃川

石洞無遺構。空巖長松桂。入深忽已陰。升高稍知霽。山光
晚多姿。谷響秋轉厲。緬懷避秦者。一往成永逝。

平越

清晨發平越。霧暗山益密。僕夫各相戒。路遠恐迷失。薄午
游氣清。參差衆峯出。雞鳴谿谷中。始見崖上日。雲葉分杳
冥。高原被華實。秋風起叢林。興感乃非一。悠悠遠行遊。歷
險難具述。此作頗似青邱

泊雲陽江頭翫月

扁舟泊沙岸。皓月出翠嶺。開窗鑒清輝。照我孤燭冷。高林散踈光。遠渚接餘景。縱橫銀漢迴。三五玉繩耿。弦望幾更易。客行尚殊境。佳期邈山岳。端坐令人省。沈山子云詩品在大小謝之間

五平五仄體

秋原何蕭蕭。耳目去雜茸。枯荷猶穿塘。苦瓠尙抱隴。寒風吹空林。落日照古冢。徘徊觀陳蹤。露下髮忽疎。孫豹人云此詩不見

十三夜對月

閒居愛明月。良節復與俱。金魄麗秋闔。皓彩揚雲衢。澄空斂霜煙。清飈蕩中區。徘徊廣庭內。改席臨方除。顧景怵衷慮。興心念居諸。天道遞消長。戒之在須臾。懷謙可久安。盛

滿豈恒居孰云質靡盈所貴光不渝

十四夜同清溪子對月

林塘枉佳客。待月欣舉觴。今夕勝昨夕。已見生東方。離離絳霄側。冉冉素雲揚。踰時灑氣澈。懸耀天中央。仰視渺難卽。忽覺在我傍。清池含微波。左右滉流光。月行固當望。人會何能常。與子各鄉域。邂逅臨此堂。良時不屢值。明月安可忘。醉歌答永夕。和我窈窕章。

十六夜月

日夕城煙斂。列宿出復多。開軒望明月。展席流素波。圓輝雖少虧。猶能遍天涯。單居不爲樂。念遠徒咨嗟。美人越崇京。高樓結綺霞。浮雲暮長征。何由覩光華。迅飈萬里至。霜

霧日以加。坐憂桂枝。歇委落。同泥沙。清輝苟相照。豈慮天路遐。朱笠亭云三詩寄託遙深。能於每夜對月時各極其趣。自是高手合觀之。可得古人用思之變。

擣衣

涼飈吹閨闈。夕露淒錦衾。言念無衣客。歲暮方寒侵。皓腕約長袖。雅步飾鳴金。寒機裂霜素。繁杵叩清砧。哀音緣雲發。斷響隨風沉。顧影惜流月。仰盼悲橫參。路長魂屢徂。夜久力不任。君子萬里身。賤妾萬里心。燈前擇妙匹。運思一何深。裁以金剪刀。縫以素絲鍼。願為合歡帶。得傍君衣襟。

陳臥子云蕙心蘭質綺羅如在元美所謂却扇一顧時也

與賈郡博宿夜話

世故相糾纏。人生劇如繫。予方值憂艱。子亦念淹滯。邂逅

胡不頻。茲歲忽將逝。蒼蒼季冬夕。悄悄昆陽。積雪委沙曲。迴風薄林際。繁星爛高寒。明月皓不霽。聞雞起中夜。捫蝨談當世。蕭條時事危。寂寞古人計。天地非瘡痍。江湖愧經濟。懷哉式微詩。泣然出雙涕。

送崔氏

澄懷云此詩似指空同隙未而作

飄飄山上葛。纍纍田中瓠。苟非同根蒂。纏綿安得固。人情易反復。結交有新故。嗟哉夙昔好。乖棄在中路。明珠倘無因。按劍不我顧。深言匪由衷。白首為所誤。亮君勗恒德。永副平生慕。

姜子嶺至三岔

出嶺上雲霓。入谿下煙嵐。高高不可極。杳杳詎能探。朱崖

明三才詩選初集卷四
十一
秀夏木石壁映寒潭。千林覽葱蒨。百丈窺澄涵。崩奔谷響赴。隱曜川光含。登陟力不辭。險阻情已諳。潛淵羨垂綸。越巘思停驂。振策岷峨西。揚帆江漢南。臨深匪忘懼。履坦但懷慙。

青石崖棧

側行青石棧。誰能久延佇。斷板連曳雲。噴泉灑飛雨。迅流西回激。峻坂東折屢。隕岸互傾欹。危梁裊撐拄。飲猿駭遊鱗。立馬接翔羽。慎爾千金軀。永念垂堂語。沈確士云信陽有少陵體此連上章乃少陵體也

古松行

岳州地多古松樹。千株萬株植官路。故老猶能記歲年。行

人不解知朝暮。臨江西來烟霧起。夾谷連山一百里。黛色寒通七澤雲。秋聲夜捲三江水。郡城之北江水東。鄂王祠廟丹青空。英雄爲謨本宏遠。古木至今多烈風。忠竟義魄杳何在。故物依然見遺愛。繁枝百世人不剪。直氣千尋我當拜。六年前過蒲圻城。古松陰中三日行。空山倒掛雷雨黑。盛夏常貯炎風清。郵亭傳舍總蕭瑟。鬱抱煩襟亦飄逸。迴巖峭壁奔洪濤。老蔓長藤翻白日。只今復向巴邱道。野艸漸多松漸少。仄徑孤根半蝕苔。夕陽幾樹空垂蔦。昔時所見合抱材。斷枝落葉隨蒿萊。過客山中想清籟。行徒道上愁黃埃。輦山輿嶺萬千重。半作豪家樓上棟。古人之力今人勞。大厦明堂不得用。年年官吏催斧斤。故老雖怒那

敢噴。傍枝出地子成樹。桮婦山樵摧作薪。驛前數幹聊可
數。我忽見之再三撫。霜皮露甲如虬蟠。霧鬣烟鬟學龍舞。
陰森氣象凜猶昔。翠色長標不可侮。荒林曠野識者稀。終
爲誰家起廊廡。回首鄂廟秋山阿。廟前之樹無高柯。鬼神
訶護亦徒爾。英靈不返將如何。達人且勿怨搖落。志士胡
爲傷軼軻。君看世事盡如此。拔劍聽我松前歌。

津市打魚歌

大船峩峩繫江岸。鮎魴鱖收百萬。小船取速不取多。往
來拋網如擲梭。桡人無船住水滸。織竹爲梁數如筍。夜來
水長沒沙背。津市家家有魚賣。江邊酒樓燕估客。割髻砍
鱸不論百。楚姬玉手揮霜刀。雪花錯落金盤高。鄰家思婦

清晨起買得。蘭江一雙鯉。篋篋紅尾三尺長。操刀具案不
忍傷。呼童放鯉撇波去。寄我素書向郎處。
陳臥子云
調古詞俊

寄李空同

黃河臘月冰十丈。縱有鯉魚那得上。楚天鴻雁避霜雪。未
得逢春難北向。康王城邊沙艸曠。梁王臺上多暮雲。野人
歲晚誰相對。桐柏山中空憶君。
陳臥子
云盛唐

歲晏行

舊歲已晏新歲逼。山城雪飛北風烈。徭夫河邊行且哭。沙
寒水冰凍傷骨。長官叫號吏馳突。府帖連催築河卒。一年
徵求不少蠲。貧家賣兒富賣田。白金縱有非地產。一兩已
值千銅錢。往時人家有儲粟。今歲人家飯不足。饑雀翻飛

不畏人老鴉鳴噪日近屋生男長成娶比鄰生女落地思
嫁人官家私家各有務百歲豈止療一身近聞狐兔亦徵
及列網持罾徧山域野人知田不知獵蓬矢桑弓射不得
嗟吁今昔豈異情昔時新年歌滿城明朝亦是新年到北
舍東鄰聞哭聲

漢將篇

漢家西北煙塵起烽火夜照西京裏勁鹵奔騰一萬騎關
塞逶迤五千里飛符插羽募精強連營列陣埽邊疆已見
將軍屯細柳更聞天子獵長楊長楊羽獵兵威振豐鼓鳴
鉦聞遠近龍虎遙分天上軍魚蛇徧闕雲中陣長安驄馬
俠少年金鞍玉轡鐵連錢共看拔劍追驕子自許彎弓

左賢驚馬風晝起邊沙漲疎勒黃雲迷所向飲馬寒臨月窟
傍驅兵夜度天山上降旗款節樹戎城卷旆迴旌入帝京
征人半死龍庭戰壯士俱標麟閣名麟閣功名不易得貴
臣良相徒顏色威胡盡道李飛將還漢誰言蘇屬國玉門
關外朔雲愁燕領書生亦白頭君王自憶廉頗輩義士羞
稱萬戶侯
整練非初
唐可及

懷舊吟贈阮世隆

君家高樓對芳樹開宴曾留三日住銅槃絳蠟爇照春金
壺銀漏寒催曙知君重義多豪游滿門賓客爲我留珊瑚
不避鐵如意驕驪皆纏金絡頭爾時北上與君別蔡州城
外花如雪夢裏猶尋汝上雲醉中却憶淮西月丈夫富貴

各有因。如君立身亦不羣。行年四十未白髮。生兒十八期
青雲。君從秋日遙分手。我向東風一回首。山下長攀舊薜
蘿。樓前應長春楊柳。宋轅文云極似李
頎而適麗過之

隴右行送徐少叅

隴右地長安西行一千里。秦日長城號塞垣。漢時故郡稱
天水。聖朝掃盪無烽烟。射獵之地爲桑田。熟羌賣馬常入
塞。將軍遊騎不出邊。知君風采古遺愛。揚鞭傳符度關內。
父老三秦望節來。大戎諸夷遮馬拜。開藩分道鎮邊塵。君
守巡行歷幾春。熊軾朱幡今岳伯。豸冠白筆舊臺臣。瓦亭
之西半山谷。土室陰陰連板屋。落月孤城清渭源。寒雲古
磧黃河曲。十年此地曾遊歌。別來風物今如何。竹花龜臨

鳥鼠穴。楊葉夕渡魚龍波。回看萬里風雲色。少小趨庭淚
沾臆。相送悲吟不盡情。關山隴坂高無極。

田子行

君不見黃河西來北入海。千載却倒東南流。淮水如絲納
九曲。桐柏山作崑崙邱。我家清淮邊。君家大河側。開闢二
水今合同。人生變化無南北。田子之生河降神。十五手掣
生麒麟。二十辭家觀國賓。三十謁帝爲近臣。赤墀青瑣日
月上。金馬銀臺河漢津。自矜一身遇明主。便欲登天叩天
鼓。天門晝闔守虎豹。雲師屏翳雷公怒。烟氣縹緲隨飛龍。
電光閃爍笑玉女。太清星辰下羅列。歛忽聞闔生風。雨丹
誠不回。白日照杞國。憂天獨勞苦。我持彤管雙鳳翎。浮沉

帝傍近紫庭。文園著書久。消渴據地酣。歌常不醒。長安少女花。在側茂陵美。妾空娉婷。漢王不好相。如賦方朔。誰知是歲星。愛君襟期特奇邁。諫垣給舍持風采。平生古今開萬卷。搖筆風雲動五彩。致君堯舜豈無術。許身稷卨終難改。袖中一札諫獵書。三歲磨滅未見採。鍊石何時更補天。銜沙枉自思填海。君不見楚人當時不識玉。海客無心采明月。明珠暗投反按劍。白璧三獻還遭別。連城高價後始定。照乘奇光有時發。鳳凰不及鴟鴞鳴。駑駘却笑驂騑拙。君不見長孺從來嘆積薪。公孫布衣爲漢臣。千秋開口取卿相。董生白頭甘賤貧。萬言不如一言重。直絃曲鈞安可論。賈生何能善絳灌。任安徒事衛將軍。我今與子俱落魄。

過飲悲歌。慨今昔。咸陽酒客。五花馬。邯鄲博徒。千金擲。古來豪俠亦可喜。可憐聖賢皆厄塞。豫章干雲世希用。龍泉貫斗人難識。神駿翻爲駘。下駒冥鴻已。愧籠中翼。出門與子常相憶。清淮大河見顏色。才氣橫逸。專學青蓮。

同崔子送劉以正還關中

燕川芳草歇已久。行子西行更回首。駿馬春停渭曲花。金鞭暮指秦中柳。看君兄弟皆英雄。十年側想中丞公。東山雲月臥未起。北海賓客誰相通。荷花初紅酒初碧。汝歸登堂見顏色。若問長安舊友生。崔何二子常相憶。筆勢灑脫。

樂陵令行

山東郡縣一百八。無有一城無戰場。到今漂血成野水。如

山白骨橫秋霜。雲臺功高將不收。投筆亦有書生謀。黃金
大印賜豪貴。白面豈得言封侯。唐朝公卿集如雲。平原太
守名不聞。二十四城見賊走。抗城乃是平原守。君不見前
者寇盜時。縣吏州官各亡命。北梁白馬終日行。濟上黃旗
錯相映。不聞關門戰。但聞開門迎。嗟乎平原太守樂陵令。
澄懷按此詩詠正德六年劉七之叛許忠節公
達爲樂陵令守禦全城之事許後死難江西

吳偉江山圖歌

吳偉老死不可見。人間畫史空嗟羨。吾觀此卷江山圖。飄
然意象臨虛無。想彼濡毫拂絹素。酒酣落筆神骨露。萬里
青天動海岳。空堂白日流雲霧。洲傾岸側波嶺銜。島嶼倒
影翻源潭。江邊萬舸一時發。中流颭颭開風帆。崩濤湧浪
勢難久。漁子舟人各回首。去雁遙知七澤中。落花誤認三
江口。煙峰蒼茫貌二叟。面髮衣冠頗龕醜。石林莎草恣點
染。舒卷滄洲在吾手。憶昨宏治間。偉藝實絕倫。供奉曾逢
萬乘主。招邀數過諸侯門。京師豪貴競迎致。失意往往遭
呵噀。由來能事負性氣。輒軻貧賤終其身。嗚呼吳生豈復
得。剩水殘山轉悽惻。此卷流傳天地間。我卽見汝真顏色。

胡人獵圖歌

邊沙蕭蕭天北風。高林晝屯鞍馬雄。胡人裝束身手健。真
與此圖形貌同。冬寒獵傍長城窟。城下平原日將沒。呼鷹
放犬無不爲。數騎彎弓競馳突。月高琵琶海西城。拂廬雪
乾麕毳輕。金鍾鹵酒亦易醉。玉䟽胡騶騎不行。白髮老胡

黃戰裙。抽箭仰視天。山雲衆中若認射鵬手。漢家誰是李將軍。

畫馬行

畫馬如畫龍。縱橫變化當無窮。吾觀月山子。落筆窺神工。曾向天閑貌十馬。十馬意態無一同。此馬傳來幾百年。古絹猶開沙漠風。樹裏河流新過雨。簇簇艸芽寒刺水。圉人雙牽臨水邊。草色離離亂雲綺。令人疑到渥洼傍。波底風雷鬥龍子。細看不是白鼻騮。恐是當朝獅子花。紫燕織離各惆悵。其餘駑劣何足誇。憶昔愛馬不惜千金貨。君王勤政樓頭坐。奚奴黃衫雙綉靴。廐中騎出樓前過。紅帕初籠汗血香。玉鞭輕拂桃花破。吁嗟翫物竟何益。遺跡徒使丹青播。只今烽火西北來。沙場未聞千里才。千里才固有時回。頭爲問御者。誰君不見古人養馬如養士。一飽能酬千里志。今人養馬如養豚。廐下常堆蒺藜刺。古之良馬何代無。可笑今人空按圖。朱錫鬯云仲默題畫諸篇源出杜陵匪徒貌似神亦似之

吳偉飛泉畫圖歌

長安獨過田子舍。留我一翫飛泉畫。絕壁如聞風雨來。晴天安得蛟龍掛。吳生跌宕得畫理。潦草落筆皆可喜。飛泉却出沓嶂間。山卽真山水真水。客堂六月生畫寒。耳中髣髴高江灘。源潭窈窕不可測。波浪洶湧多奇觀。泉邊二老顏色異。偶坐似是莊與惠。萬里誰論到海心。百年詎識臨淵意。偉哉田子今儒宗。文標南指匡廬峰。不須對此更惆悵。

帳。會觀瀑布青天上。杉風松日隔縹緲。雲瀧雪瀨何雄壯。
我常夢往神空向。豈無吳生好手筆。爲我寫寄廬山障。

卿云氣韻生動畫中
山水人物歷歷如視

畫魚

大魚昂藏若人立。衝波跋浪風江急。傍觀二鯉各有神。倏
忽波濤隨出入。中堂鬢鬣動杳冥。坐久始識爲丹青。青天
萬里拂絹素。筆力咫尺開滄溟。禹門天池雲霧裏。白晝雷
霆行地底。何人有力移置此。酒酣相視一改容。只愁化作

三蛟龍。楊用修云
雄奇排宕

明月篇 并序

僕始讀杜子七言詩歌愛其陳事切實布辭沉著鄙心

竊效之以爲長篇聖於子美矣既而讀漢魏以來歌詩
及唐初四子者之所爲而反復之則知漢魏固承三百
篇之後流風猶可徵焉而四子者雖工富麗去古遠甚
至其音節往往可歌乃知子美辭固沉著而調失流轉
雖成一家語實則詩歌之變體也夫詩本性情之發者
也其切而易見者莫如夫婦之間是以三百篇首乎雎
鳩六義首乎風而漢魏作者義關君臣朋友辭必託諸
夫婦以宣鬱而達情焉其旨遠矣由自觀之子美之詩
博涉世故出於夫婦者常少致兼雅頌而風人之義或
缺此其調反在四子之下與暇日爲此篇意調若髮髯
四子而才質猥弱思致庸陋故摛詞蕪紊無復統飭姑

錄之以俟審聲者裁割焉

長安月。離離出海嶠。遙見層城隱半輪。漸看阿閣銜初照。
激灩黃金波。團圓白玉盤。青天流影披紅蕖。白露含輝汎
紫蘭。紫蘭紅蕖西風起。九衢夾道秋如水。錦幌高褰香霧
濃。瑣闌斜映輕霞舉。霧沉霞落天宇開。萬戶千門月明裏。
月明皎皎陌東西。柏寢峇堯望不迷。侯家臺榭光先滿。戚
里笙歌影乍低。濯濯芙蓉生玉沼。娟娟楊柳覆金堤。鳳凰
樓上吹簫女。蟋蟀堂中織錦妻。別有深宮閉深院。年年歲
歲愁相見。金屋螢流長信階。綺籠燕入昭陽殿。趙女通宵
侍御床。班姬此夕悲團扇。秋來明月照金徽。榆黃沙白路
逶迤。征夫塞上行憐影。少婦窗前想畫眉。上林鴻雁書中

恨。北地關山笛裏悲。書中笛裏空相憶。幾見盈虧淚沾臆。
紅閨貌減落春華。玉門腸斷逢秋色。春華秋色遞如流。東
家怨女上粧樓。流蘇帳捲初安鏡。翡翠簾開自上鉤。河邊
織女期七夕。天上嫦娥柰九秋。七夕風濤還可渡。九秋霜
露迥生愁。九秋七夕須臾易。盛年一去真堪惜。可憐揚彩
入羅幃。可憐流素凝瑤席。未作當鑪賣酒人。難邀隔座援
棊客。客心對此嘆蹉跎。烏鵲南飛可柰何。江頭商婦移船
待。湖上佳人挾瑟歌。此時憑闌垂玉筍。此時滅燭斂青蛾。
玉筍青蛾苦緘怨。緘怨含情不能吐。麗色春妍桃李蹊。遲
輝晚媚菖蒲浦。與君相思在二八。與君相期在三五。空持
夜被貼鴛鴦。空持暖玉擊鸚鵡。青衫泣掩琵琶絃。銀屏忍

對。筮。篔。語。筮。篔。再。彈。月。已。微。穿。廊。入。闥。靄。斜。輝。歸。心。日。遠。

大刀折極目天涯破鏡飛。朱錫鬯曰初唐四子體今人棄之若土苴矣然其音節宛轉從

六朝樂府中來初學者正不可不知也仲默明月篇擬議頗工未墮惡道少陵詩云王楊盧駱當時體輕薄為文哂

未休爾曹身與名俱滅不廢江湖萬古流其論詩之指若此然則初唐亦豈可盡廢乎

辰溪縣

早發辰溪渡。清川喜泛舟。山城歛粉堞。江驛映朱樓。雨驟沙顏岸。天寒水露洲。蠻音聞漸異。迢遞動鄉愁。

查城十五夜對月

天上何所有。團團白玉盤。可憐秋半月。只是客中看。影直朱樓午。輪高青嶂寒。美人何處共。光彩隔雲端。一氣旋折

與少陵今夜廊州月格意不殊

峽中

自昔偏安地。于今息戰侵。江穿巫峽隘。山鑿鬼門深。濁浪魚龍黑。寒天日月陰。夜猿啼不盡。淒斷故鄉心。

雨霽

斷雨懸深壁。餘雷震遠空。蒼林橫落日。碧澗下殘虹。萬井波光靜。千家樹色同。何因共朋好。歸詠舞雩風。

立秋寄獻吉

山城一葉下。水榭已迎秋。夜迥商風至。天空大火流。稍蘇司馬病。翻遣宋生愁。日暮關河外。思君重倚樓。

玉泉

行游金口寺。坐愛玉泉名。雲去隨龍女。風來動石鯨。入宮

朝太液。穿苑象。昆明却望天。河水迢迢萬古情。陳臥子云雅麗深永

送孫世其

似爾聰明少。吾生望未涯。孤城常作客。九月始還家。暮雨沉關樹。寒風落渚花。洞庭秋色裏。為我弔長沙。

懷沈子

沈生南國去。別我獨悽然。落月清江樹。歸人何處船。十年安陸舍。數口太湖田。想到鄉園日。生涯亦可憐。沈山子云極似襄陽

登堅山寺

西峯插天起。絕頂寺門開。雲裏一僧住。山中無客來。落花平。講席積草徧。香臺我欲聞。清梵焚香坐不回。

西郊秋興

野屋清秋暮。寒沙易朔風。歲年悲老樹。歧路感孤蓬。醉豈逃名士。狂非避世翁。尋常門自掩。無客到山中。舊家瀨水上。門向釣臺邊。近市來沽酒。中流坐放船。蒹葭開晚照。洲渚接寒天。漁父如相識。長歌過我前。

長安月

萬里長安月。會看照綺羅。徘徊留舞席。宛轉逐游珂。錦幌披青霧。朱樓拂絳河。佳人獨愁思。終夕抱雲和。

登釣臺

出郭冬初暮。登臺日已曛。碧潭寒吐月。青嶂晚生雲。名姓嫌人識。悲歌欲自聞。沙鷗莫飛去。應共爾為羣。得五清先生消息。尙客遭州。悵然有懷。

洞庭西去路。消息幾回聞。地僻難逢雁。天長祗見雲。白蘋悲楚客。斑竹怨湘君。宋玉哀師意。空傳九辯文。

夫子先辭國。嗟予亦罷官。生涯同去住。世事各悲懽。楚地江湖濶。巴山道路難。白頭慈母在。雨雪更愁寒。鍊句鍊意鍊格並鍊

絕頂空同能道隻字否

送李令赴宜城

名邑今為宰。東行更屬秋。青天見海岱。明月下河洲。柳傍彈琴坐。花隨放鳥遊。蒼生未蘇息。須拜富民侯。

送賈郡博之階州

十載一儒官。西行路復難。羌夷應俎豆。邊徼有衣冠。隴坂盤雲上。秦城向斗看。好音懷萬里。早晚報長安。嘉州

送曹瑞卿謫尋甸

逐客滇南郡。雲天此路長。高秋行萬里。落日淚千行。作賦投湘水。題書寄夜郎。殊方氣候異。去矣慎風霜。陳臥子云似高達夫

九日夜過劉以正別士奇

重陽愁獨酌。深夜喜相過。萬里惟秦客。三杯亦楚歌。霜笳沉海月。風雁起滹河。醉別黃花去。能忘白玉珂。

送彭總制之西川

蜀道青天。上岷山赤日。西九重連授鉞。萬里動征鼙。開府松杉靜。懸軍玉壘低。知公安蜀計。諸葛大名齊。楊用修云森嚴莊重

送以道次君卿韻

汝到河西日。常令消息聞。風塵暫把袂。霄漢忽離羣。帆轉

天邊樹樓停海上雲飄飄歧路側何地復逢君

秋夕懷曹毅之

百卉飄零盡孤鴻何處歸高樓橫暮笛萬戶搗寒衣南國
江湖遠佳人尺素稀獨愁誰與晤明月鑒重幃秀逸而有遠神

皇陵

陵闕皇靈闕山河王氣遙萬年龍虎抱每夜鬼神朝玉盃
留天地金燈照未寥如看翠華度縹緲在青霄沈確士云足繼行次

昭陵之作

殿試宿張子淳郎中署奉和馬張二光祿喬直閣諸

公

東殿春朝晚南宮夜宿深鎖闈猶月色開閣更松陰地迥

神仙接天高象緯臨諸君清廟作三嘆有餘音
蔣春甫云下字虛實

得王子衡贛榆書

萬里一書劉逾年傳帝都竄身天地遠垂淚海雲孤柳送
燕臺駿花留漢殿鳧赤霄終道路白髮且江湖

關門

虎衛關門迥龍沙塞曲深風雲時有氣日月晝長陰中使
西來訊千官北望心天寒漢宮闕翠蓋憶春臨吳明卿云氣骨清蒼

防寇

萬國猶防寇三年未罷師天清聞鼓角野曠見旌旗岸雪
晴含照山雲晚趁姿孤臣北上日想望太平時

中秋無月

月賞今年罷。高樓獨客愁。關山中夜笛。江漢故鄉舟。暗雨
捎簷入。秋螢度檻流。應知雲霧上。天柱有人遊。

雁

嘒嘒胡笳怨。飄飄南雁翔。長風度關塞。九月下瀟湘。積水
浮連影。遙空起斷行。故園秋望盡。聞爾淚沾裳。三四詠雁絕唱

蘇子遊赤壁圖

垂老黃州客。高秋赤壁船。三分留古蹟。兩賦到今傳。落日
寒江動。青天斷岸懸。畫圖誰省識。千載尚風烟。

同敬夫遊至華陽谷聞歌

名邑今重過。終南第一遊。山中白雪倡。天上綠雲流。柳散

秦川。色花含。杜曲愁。同時霄漢侶。十載臥林邱。

登樓鳳縣作

近訊中原使。兼登萬里樓。朝廷仍北極。行在且南州。峽斷
風雲隔。江通日月流。如聞乘八駿。早晚向崑邱。沈確士云此為武宗

南幸而作

武關

北轉趨劉壩。西盤出武關。微茫一線路。迴合萬重山。天地
幾龍戰。風雲惟鳥還。關門鎖溪水。日夜送潺湲。沒石飲羽之技

昭烈廟

漂泊依劉計。間關入蜀身。中原無社稷。亂世有君臣。峽路
元通楚。岷江不向秦。空山一祠宇。寂寞翠華春。黃清甫云匪值個詞

亦存
名教

武昌聞邊報

傳聞疆騎近長安。北伐朝廷已遣官。路繞居庸烽火暗。城
高山海戍樓寒。一時邊將當關少。六月王師出塞難。先帝
恩深能養士。請纓誰為繫樓闌。姚仙期云孝宗語劉健云
臨陣以軍法從事所擬太
重恐邊將起輕殺之漸此
亦恩深能養士之一也

長安驛

暮雨瀟瀟雲黯然。數家山下起炊烟。窗聞早雁秋多思。門
對寒流夜不眠。遠使正持三楚節。舊遊曾扣九江船。驛程
南去無窮路。來往風塵閱幾年。

岳陽

楚水滇池經萬里。使車重喜過巴邱。千家樹色浮山郭。七
月濤聲入郡樓。寺裏池亭多舊主。城中冠蓋半同遊。明朝
又下章華路。江月湖烟結別愁。清華流轉大復
集中最上乘

月潭寺

玲瓏金剝白雲邊。踏閣攀林一徑穿。龍出洞門常作雨。鶴
巢松樹不知年。僧來殿上鳴鐘飯。客到山中借榻眠。怪底
夜來難得寐。秋風窗下繞流泉。

安莊道中

處處人家空薜蘿。幾年凋弊擾干戈。山過白水峯巒峻。路
入盤江瘴癘多。嶺徼土風連百粵。郊原人語雜諸羅。側身
西望看銅柱。此地曾經馬伏波。

病後

病後頻經節序過。不將風景怨蹉跎。秋來門巷依楓橘。歲
晚衣裳戀芰荷。洛下閑居辭宦早。茂陵消渴著書多。鳳凰
池上三年客。蹶裏空鳴白玉珂。

吹笛

橫簫高城弄晚颼。碧空如水雁來時。關山月落腸應斷。樓
閣秋生響易悲。楊柳天邊渾折盡。梅花江畔故開遲。武陵
回首南征路。一曲那堪馬上吹。
如此學杜方是
脫胎而非剽竊

七夕

夜久江城風露收。微雲斜漢兩悠悠。閨中擣素思關塞。樓
上穿針待女牛。屏燭影深秋似水。池花香澹月如鈞。桂宮

高處寒多少。誰念嫦娥此夕秋。

月潭寺

綠蘿陰下列蒲團。茗葉松花進晚飧。近水雲霞晴亦雨。傍
巖樓閣晝長寒。旅懷寥落逢秋半。僧話淹留坐夜闌。惆悵
塵蹤又南去。朝來鐘磬隔烟巒。

華容弔楚宮

別館離宮艷綺羅。細腰爭待楚王過。章華日晚春游盡。雲
夢天寒夜獵多。廢殿有基人不到。荒臺無主鳥空歌。西江
煙月長如舊。只有繁華逐逝波。

秋興

憶在京華近侍年。五更清珮入朝天。鳳凰池接夔龍會。閨

闔樓開日月懸。南國自通滄海。真塞塵不動。玉門煙只今。
病臥遙回首。夜夜清光北斗邊。

前歲今皇新御極。鳳銜恩詔出明廷。孤槎奉使日南國。萬
里題詩天畔亭。地入金沙江浩浩。風連銅柱海冥冥。昆明
亦在滇城裏。池上虛疑織女星。

蜀中形勝千年在。峽樹江花照使袍。神女廟深虛暮雨。漢
王臺迥落秋濤。漁人東望滄浪濶。客子西來灩澦高。不見
啼猿繫舟處。風波遙夕夢蒐勞。

漢水東馳入楚來。長沙秋望洞庭開。江清樓閣中流見。日
落帆檣萬里回。去國尚思王粲賦。逢時空惜賈生才。湘南
兩度曾遊地。惆悵烟花暮轉哀。
少陵未易學步莊
麗故是大復本色

溪上

溪上茅齋不掩扉。西風初罷芰荷衣。月寒沙柳蕭蕭落。天
晚江鴻肅肅飛。野客行吟水邊立。家人沽酒夜深歸。相逢
醉語休辭數。城外黃花漸覺稀。

答雷長史

每誦清詞動我愁。山中歲暮若爲酬。因攀桂樹遙相憶。欲
寄梅花可自由。萬里江湖雙涕淚。百年天地幾交遊。誰憐
舊日中朝客。謫向王門半白頭。

八日王宗哲宅見菊

燕臺叢菊艷秋堂。楚客鄉心益渺茫。人世幾回逢一笑。天
涯明日過重陽。高雲錦石寒相映。細雨清沙濕不妨。況是

右丞多雅詠可能無興醉花傍

送雷長史

彤管先朝隨帝子。白頭今日奉王孫。漢庭亦羨相如美。楚客重看賈傅尊。花下圖書開玉殿。日高琴瑟在朱門。十年亭閣淮西宴。腸斷梁王雪夜樽。陳臥子云潦倒遲暮寫得可念

寄黔國公

萬里山川開百粵。十年戎馬暗三巴。伏波銅柱衝炎塞。橫海樓船出瘴沙。鴻雁不傳天北字。瓊瑤空憶日南華。飄飄奉使金門客。目斷銀河八月槎。

送張國賓進萬壽表還

名王表達維藩禮。賓使恩勤奉教時。鳳管暫停秦女曲。龍

旂遙覩漢官儀。秋楓旅夢迴青瑣。春草鄉情動玉池。歸到定知承睿問。雪園梅殿有佳期。

劉德徵上陵還有贈

仙郎昨自五陵歸。駿馬朝回獨掩扉。已向西山瞻帝寢。更從北極眺王畿。霜鐘澗壑流清漢。玉殿松杉眇翠微。先帝侍臣零落盡。秦園宮草日霏霏。與昌穀昔送宮車出之作並見忠愛

送劉養和侍御謫金壇

丹陽北郭是金壇。此去無歌行路難。當道豺狼曾避馬。得時鷹隼却驚鸞。風霜歲杪留顏色。鐵石人間識肺肝。漢北陝南今涕淚。不知遷逐向江干。

得獻吉江西書

近得潯陽江上書。遙思李白更愁予。天邊魑魅窺人過。日暮鼉鼉傍客居。鼓枻襄江應未得。買田陽羨定何如。年淮水能相訪。桐柏山中共結廬。沈確士云神來之作所謂章法之妙不見句法者

送韓大令赴新都

漢庭仙令幾時回。蜀道風煙此日開。萬里一琴將鶴去。九霄雙鳥望鳧來。雲邊石棧斜懸閣。樹裏春流曲抱臺。藏器久知盤錯志。脫囊今見古人才。

送施聘之侍御

海甸春風攬轡情。燕關驄馬去還鳴。繡衣霄漢花間出。錦纜江湖樹裏行。近日西臺多諫草。少年南國有詩名。別絃更憶風流調。愁聽東城二月鶯。宗子相云綺語逸韻恍對玉謝風流

鱗魚

五月鱗魚已至燕。荔枝盧橘未應先。賜鮮徧及中璫第。荐熟誰開寢廟筵。白日風塵馳驛騎。炎天冰雪護江船。銀鱗細骨堪憐汝。玉筋金盤敢望傳。沈確士云賜及中璫而寢廟未薦則波及臣家益無望矣中含諷諭不同尋常賦物又云少陵西蜀櫻桃一種作法

送衛進士推武昌

少年佐郡楚城居。十郡風流盡不如。去日隨彭蠡雁何須。不食武昌魚。仙人樓閣春雲裏。賈客帆檣落照餘。大別山前江漢水。畫簾終日對清虛。穆敬甫云風度若鯉躍晴波鳥鳴春谷

懷寄邊子

汝從元歲侍今皇。誰念先朝老奉常。一出雲霄空悵望。十

年歧路各蒼茫。春天縹緲金莖露。晝日氤氳紫殿香。獨有揚雄尚陪從。白頭抽筆賦長楊。

送陸舍人使吳下

柳拂清江畫鷁飛。節旌更喜便南歸。迴風樹裏吹官騎。返照河邊上客衣。北固樓臺秋寺遍。長洲花草故宮非。登臨莫怪多詞賦。吳下才人是陸機。

送秦豫齋南歸領教安仁

兩年京國喜同遊。忍送孤帆下潞州。世事悠悠雁南去。客懷渺渺水東流。雲間樹色通吳苑。月下潮聲過石頭。聞到錦江三畝宅。開門遙對萬峯秋。

送徐士事還金陵

送客出門三月暮。片帆遙見石頭城。南方山水登仙輿。北望星辰戀主情。花暗河橋春雨細。月殘江館夜潮平。鳳凰臺上重回首。六代繁華野草生。穆敬甫云風致如月出石渠芙蓉散華

輞川

飛泉萬壑通藍水。仄徑千峯入輞川。野老豈知旌節到。世人空作畫圖傳。鼉鼉岸坼疑無地。雞犬林開忽有天。卽此買山堪避俗。桃源何處訪神仙。

送胡承之北上

秦關迢遞南山曲。漢閣嶙峋北極長。揚策耻誇終孺子。上書不學老馮唐。斗邊銀漢仙槎影。天上春雲畫省香。此去中朝才子列。定知詞賦有輝光。似東川

獨立

獨立對秋陰。冥冥望河渚。只見沙上烟。不見烟中雨。

長安

白雲望不盡。高樓空倚欄。中宵鴻雁過來。處是長安。

盤屋清明日

獨樹桃花自發。高樓燕子誰家。可惜年年春色。催人白髮。

天涯。

江南思

燈下雨。鳴秋舫。浦口潮迴暮鐘。何處相思不見。江南開遍。

芙蓉。

秋日雜興

雨花風葉總堪憐。海燕江鴻各渺然。莫向高樓空悵望。暮蟬多在夕陽邊。

急杵繁砧一郡秋。西風落月萬家樓。不知塞上征人怨。但見閨中少婦愁。

別相餞諸友

雙井山邊送客時。滿林風雪倍相思。西行萬里遙回首。太華終南落日遲。沈確土云只寫景而離情自見得唐人三昧

任洪器草亭

繞屋南山空翠靜。數枝寒菊一籬烟。酒醒讀罷秋聲賦。風落松梢響石泉。

送鄉人還

楊柳花飛蕪草青。故鄉南望幾長亭。城邊客散重迴首。愁見孤鴻落晚汀。

送韓汝慶還關中

華岳雲臺萬里情。高秋落日眺秦城。黃河一線通滄海。身在仙人掌上行。

